

Inyarubha ye embere ya Paauru kwa **Abhakurintu** **Ubhukangati**

Inyarubha yinu yandikirwi na Paauru, umutumwa wa Yisu Kiriisitu, na Sesiitini. Bhakaandika inyarubha yinu kwa risengerero rinu Paauru aatangiri murubhiri rwa Kurintu. Urubhiri rwa Kurintu rwari mukihuuka chi inyanza ya Midingiraniyaani. Abhaatu kurwa mbaara zusa bhaari bharagurya na kugura ebhegero bhyaru murubhiri ruyo. Abhaatu bhayo bhaari ni isimuka nzaru ibhaga ryaru, kwa kosengera amabhirubhiru. Zisimuka ziyo zikakora Abhakiriisitu bhakataamibhwa kubhwisirirya bhwabhu na kubhuurya Paauru.

Paauru akiikara Kurintu kwa mwaka gumwi, aari ariija abhaatu bhaaru iguru wa Yisu na bhaaru bhaari bhiisiriiryi. Nawe hanu aabhuukiri, akabhona amang'ana iguru wa Abhakiriisitu iyo. Akabhuurirwa kubha bhaari na amaribhita mamasengerero na kwari ni ikisimbi, itaaru na bhakabhuurya iguru wa amang'ana gu ubhukwiri.

Manyarubha ya Paauru arabhabhuurira chimbu abhaatu bhindirwi kokora mwisengerero ribhaga ryi ibhyakurya bhyu Umukuru na amasabhi. Iguru wa gayo, Paauru ariija iguru wa ubhunaja bhwe Ekoro Indindu, ubhumwimwi bhwa Abhakiriisitu moKoro nu ukuryukurwa kwa abhaku.

Itinirũ arabhaha amaswaja igurũ wũ ubhusakirya kubhiisirirya Yirusarĩmu.

Amakeeren'ya

¹ Inyarubha yinũ nandikiri inyĩ Paaurũ, niri hamwimwi nu umwisirirya umakindichitũ Susitiini. Inyĩ nikabhirikirwa kubha umutumwa* wa Yĩsu Kiriisitũ kubhusiigi bhwa Mungu.

² Turabhaandikira imwi abhiisirirya bhũ urubhiri rwa Kurintũ. Mungu abharubhwiri na kubhĩgukibhwa na Yĩsu Kiriisitũ, abhabhirikiiri kubha abharindu† bhaazi. Turabhaandikira imwi hamwimwi na abhaatũ bhũsi bha zimbaara zũsi bhanũ bhakosengera Yĩsu Kiriisitũ, Umukurũ waabhu na Umukurũ wiitũ.

³ Ibhiigangi no omorembe kurwa kwa Bhaabha Mungu, na kuMukurũ Yĩsu Kiriisitũ, bhibhi na niimwi.

Paaurũ arabhũrira Mungu azumiryi

⁴ Nirabhũrira Mungu azumiryi ibhaga ryũsi igurũ waanyu, ku kubha ibhiigangi bhinũ abhahiri kanzira ya Yĩsu Kiriisitũ.

⁵ Ku kugwatana kwanyu na Kiriisitũ muniibhiri kamang'ana gũsi, kindi ku kũgamba kwanyu na kubhũminyi bhwanyu.

⁶ Gayo gareereken'ya kubha amang'ana ganũ twabharwaziiri igurũ wa Kiriisitũ, ni-ga amaheene.

* **1:1 Umutumwa.** Kamaragirira bhakung'u, rora ring'ana abhatumwa muKiniibhasa. † **1:2 Abharindu.** Kamaragirira bhakung'u, rora Ikiniibhasa.

⁷ Nangu mutasuuhirwi nauru ubhunaja bhumwi bhwe Ekoru Indindu,‡ mukiri mararinda kwa miiga maruru ukugaruka ku Umukuru witu Yisu Kiriisitu.

⁸ Mungu arabhakong'ya kuhika mutinira, koreke mtaaza kubha ni isoro, urusiku ruru Umukuru Yisu Kiriisitu akuuza.

⁹ Mungu arakora gayo ku kubha ewe, ne-moheene. Ewe newe aabhabhirikiiri mubhi ni ikigwatani nu Umwana waazi Yisu Kiriisitu, Umukuru witu.

Ubhumwimwi gati wa abhiisirirya

¹⁰ Nangu, abhahiiri bhaani, nirabhiisasaama kuriina rya Umukuru witu Yisu Kiriisitu, matabha marataana mumagamba. Gatabhaho amataa-man'ya gati waanyu, nawe mubhi na amiisiigi gamwi nu ubhwindi bhumwi.

¹¹ Abhahiiri bhaani, abhaatu obhorebhe bhu Kirowe bhambuuriiri, kuni iryuma gati waanyu.

¹² Nangu, ganu nikwenda kugamba nego ganu, abhaatu bhusi gati waanyu bharagamba gaabha. Usumwi arabhuga, "Inyi ni-wa Paauru." Uwundi arabhuga, "Inyi ni-wa Apooro." Uwundi arabhuga, "Inyi ni-wa Peetero."§ Uwundi arabhuga, "Inyi ni-wa Kiriisitu."

¹³ Nangu, Kiriisitu atwanikini? Paauru newe aakuuri kumasarabha iguru waanyu? Mukabhatiizwa kuriina rya Paauru?

‡ **1:7 Ekoru Indindu.** Kumaragirira bhukung'u, rora Ikiniibhasa.

§ **1:12 Peetero** iriina irindi arabhirikirwa *Keefa*.

14 Nirakumya Mungu, ku kubha nitaabhatiiziri umuutu wawusi kwa niimwi, kuruushaku Kiriisipu na Gaayo.

15 Atareeho wanu akutara kubhuga abhatiizirwi kuriina ryani.

16 Nirahiita nikabhatiiza kwiki abhaatu bhu Sitifaana. Nawe kukira bhayo, nitizi ariibhi nikabhatiiza umuutu wundi wawusi.

17 Kiriisitu ataantumiri inyi kubhatiiza abhaatu. Akantuma kurwaza Ing'ana Inzumu, atiisigiri ubhwabhuri bhwani bhwu ukugamba bhwaheene, korereke uruku rwa Kiriisitu kumusarabha rutabhurya amanaga gaazi.

Kiriisitu newe zinguru nu ubhwabhuri bhwa Mungu

18 Abhaatu bhanu bhabhuriri bhararora kubha amang'ana gu ukukwa kwa Kiriisitu kumusarabha, ni-ga kegeege, nawe kwa niitwi bhanu tukusabhurwa, amang'ana gayo gareerecha amanaga ga Mungu.

19 Chimbu yandikirwi muMaandiku Amarindu, "Nirasarya ubhwabhuri bhwa abhaatu bhu ubhwabhuri.

Nirarimirya ubhung'ini bhwa abhaminyi.”*

20 Nangu bhari hayi bhanu tukubhuga bhaanu ubhwabhuri? Bhari hayi bhanu tukubhuga ni-bhiija bhi imigiru ja Musa, nuru abhaatu bhanu bhizi kugamba bhwaheene zisiku zinu? Mungu irikiin'yi habhwiru kubha ubhwabhuri bhwi isi yinu, ne-bhogege.

21 Niragambabhu, ku kubha Mungu, kubhwabhuri bhwazi, akeenda abhaatu

* 1:19 Rora Isaaya 29:14.

bhatatūra komomenya kanzira yu ubhwabhuri
bhwabhu abheene. Nawe Mungu akasiiga
kubhasabhura bhanu bhakumwisirirya kanzira
ya amang'ana ganu tukuragan'ya. Amang'ana
gayo, abhaatu bhanu bhatiizi Mungu, bharabhuga
ni-ga kegeege.

²² Abhayaahudi bhareenda ichirikin'yu kurwa
mwisaaru korereke bhiisiriryi, Abhagiriki
bharamohya ubhwabhuri.

²³ Nawe itwi, turaragan'ya amang'ana iguru wa
Kiriisitu wunu aakuuri kumusarabha. Amang'ana
gayo garanyahaara Abhayaahudi, na kubhanu
bhatar Abhayaahudi ni-mang'ana ga kegeege.

²⁴ Nawe kubhanu Mungu aabhabhirikiiri ab-
haazi, bhabhi Abhayaahudi hamwi bhabhi Ab-
hagiriki, Kiriisitu newe amanaga ga Mungu nu
ubhwabhuri bhwa Mungu.

²⁵ Amang'ana ganu abhaatu bhakorora
kubha ne-bhogege bhwa Mungu, garakira
ubhwabhuri bhwa abhaatu. Na ganu bhakorora
kubha ni-bhanyuhiriru bhwa Mungu, gana
amanaga kukira amanaga ga abhaatu.

²⁶ Nangu, abhahiiri bhaani, muhiiti chimbu
mwari hanu mwabhirikiirwi na Mungu. Ku-
miisiigi ga abhaatu, bhaaru gati waanyu bhataari
nu ubhwabhuri. Naatu abhaaru gati waanyu
mataari muramenyekana bhakung'u, na mutiibh-
wirwi mumiji ja abhataaki.

²⁷ Nawe Mungu akarobhora amang'ana ganu
abhaatu bhakorora ne-bhogege, korereke
abhasuuchi bhu ubhwabhuri. Na Mungu
akarobhora amang'ana ganu abhaatu bhakorora
ni-bhanyuhiriru, korereke abhasuuchi bha

amanaga.

²⁸ Na Mungu akarobhora amang'ana ganu abhaatu bhakorora gataana ubhusuuku na ganu bhakorega, na ganu bhakorora gataana nzobhooro, korereke asaryi amang'ana ganu abhaatu bhakorora gane enzobhooro.

²⁹ Akakorabhu korereke umuntu wawusi atikumya mubhutangi bhwa Mungu.

³⁰ Mungu newe abhagwatiin'yi imwi na Yisu Kiriisitu. Ewe akuriri Kiriisitu abhi ubhwubhwarei bhwitw. Kanzira ya Yisu tubhiri bhe eheene mubhutangi bhwa Mungu, tubhiri abharindu, na tsabhwirwi.

³¹ Chimbu yandikirwi maMaandiku Amarindu, "Umuntu wanu akwikumya, ikumyi iguru wa Umakuru."†

2

Kurwaza ing'ana iguru wa Yisu Kiriisitu

¹ Abhahiiri bhaani, hanu niiziri kwa niimwi nikaaza kubharwazira iguru wu ubhwindi bhwa Mungu bhenu bhwarei bhubhisirwi,* nitaagambiri kwa bhukaari bhwa amang'ana nenu kubhwubhwarei.

² Hanu naari kwa niimwi, nekeenda nigambi amang'ana iguru wa Yisu Kiriisitu,† kinda ukukwa kwazi kamasarabha, na nitaagambiri ekegero ikindi.

³ Ribhaga riyo naari munyuhiriru, naari nu ubhwubha, naatu naari nirarigita bhukung'u.

† 1:31 Rora Yirimiya 9:23-24.

* 2:1 **Ubhwindi bhwa Mungu bhenu bhwarei bhubhisirwi**, Zibhibhuriya izindi zirabhuga, ubhuminyikiriri iguru wa Mungu. † 2:2 **Kiriisitu**. Kamaragirira bhukung'u, rora Ikiniibhasa.

⁴ Hanu naari nirijja na kurwaza, nitaagambiri amang'ana kubhwabhuri bhwani, korereke nibhakorokombe imwi munyiisiriri. Nawe amanaga ge Egoro Indindu nego ganyirikiri amaheene.

⁵ Nikakorabhu, korereke ubhwisiririya bhwanyu bhutiisega ubhwabhuri bhwa abhaatu, nawe bhwisega amanaga ga Mungu.

Ubhwabhuri kurwa kwe Egoro Indindu

⁶ Nangu turagamba amang'ana gu ubhwabhuri kubhaatu bhanu bhakung'iri mubhwisiririya, nawe ubhwabhuri bhuyo bhutari bhwii isi yinu, na bhutari kwa abhakangati bhi isi, bhanu bhakuhita.

⁷ Ubhwabhuri bhanu tukaragan'ya ni-mbisi ya Mungu yinu yaari ibhisirwi. Nebhwe Mungu indiri kwima aari akiiri kubhamba isi, korereke atokorere amazamu.

⁸ Atareeho nuru wumwi mubhakangati bhi isi wunu aaminyiri ubhwabhuri bhuyo, ku kubha bhangubhuriri, bhataari bharamubhamba kumasarabha Umukuru wu ubhukumya.

⁹ Nawe chimbu yandikirwi maMaandiku Amarindu,
“Ganu Mungu aabhakiriri bhanu bhamusiigiri,
atareeho umutu wunu aagaruzi nuru kugigwa,
atareeho umutu wunu aagatiri mumwayu gwazi.”[‡]

¹⁰ Nawe itwi, Mungu akatwerecha gayo kuhitira Egoro Indindu, ku kubha Egoro Indindu ihaatugunkurya gusi, nuru isimi ya Mungu yinu ibhisirwi.

[‡] 2:9 Rora Isaaya 64:4.

¹¹ Ni-wiiwi wanu akutara komanya ganu umuntu uwundi akwiseega? Ekoru yaazi iyeene neyo iminyiri. Ibhuibhu na ganu Mungu akwiseega, atareho wanu akutara kugamenya. Ekoru ya Mungu iyeene neyo yiizi.

¹² Mungu atuhiri itwi Ekoru yaazi, itari zekoro za kuusi, korereke tugamenye ganu tuhirwi kurubhangu rwa Mungu. Tutakwiseega chimbu abhaatu bhanu bhakwiseega ga kuusi, bhahiiseega.

¹³ Na tutakugamba amang'ana ganu twijibhwi nu ubhwubhuri bhwa abhaatu, nawe amang'ana ganu twijibhwi ne Ekoru ya Mungu. Taragarara amang'ana ge Ekoru ya Mungu kubhanu bhane Ekoru yiyo. §

¹⁴ Nawe umuntu wanu ataana Ekoru ya Mungu, atakusung'aana ganu gakurwa kwe Ekoru ya Mungu, ku kubha kwawi gayo ni-ga kegeege. Atakutara kogoobhoora, ku kubha gaminyikini kubhasakirya bhwe Ekoru ya Mungu.

¹⁵ Umuntu wanu akukangatwa ne Ekoru ya Mungu aragiisunza guusi, nawe ewe, umuntu wawuusi atakutara kumwisunza.

¹⁶ Chimbu Amaandiku Amarindu gakubhuga, “Ni-wiiwi wanu aminyiri ganu Umukuru Mungu akwiseega?

Na ni-wiiwi wanu akutara kumugamban'ya?”*

Nawe, itwi turiiseega amang'ana chimbu Kiri-isitu akugiiseega.

§ 2:13 *Kubhanu bhane Ekoru yiyo*, ubhagaruri ubhundi bharatara kubha, *kumang'ana ga mokoro*. * 2:16 Rora Isaaya 40:13.

3

Ubhutaaman'ya kubhaatu bha Kurintu

¹ Abhahiiri bhaani, hanu naari kwa niimwi nitaari niragamba na niimwi ncha abhaatu bhanu bhakukangatwa ne Ekoru Indindu. Nawe naari niragamba na niimwi ncha abhaatu bhanu bhakukangatwa na amang'ana gi isi, naatu ncha abhaana abhabhataari ku kwisirirya Kiriisitu.

² Abhaana abhabhataari bharanywa amabheere ageene, bhatakuhabhwa ibhyakurya bhya abhaatu abhagima. Ibhuibhu na niinyi nikabhaha amijja amahuhu ku kubha mwari mukiiri kokong'a. Nuru nangwinu mukiiri kokong'a,

³ ku kubha mukiiri marakangatwa na amang'ana gi isi. Ariibhi gati waanyu kuna rihari ni iryamana, gayo gatakwerekan'ya kubha mukiiri marakangatwa na amang'ana gi isi na kwikara ncha abhaatu bhi isi?

⁴ Niragambabhu ku kubha hanu umutu wumwi akubhuga, "Inyi ni-wa Paauru," wundi arabhuga, "Inyi ni-wa Apooro." Gayo gareereken'ya kubha, mukiiri marakora ncha abhaatu bhi isi.

⁵ Mmbe nangu, Apooro, ni-wiwi? Na Paauru, ni-wiwi? Itwi ni-bhahocha bhanu Mungu aatumiri kubhasakirya imwi mwisiriryi. Itwasi tarakora emeremo ginu bhahirwi na Umukuru.

⁶ Inyi nikahamba zendetere, Apooro akiitirira, nawe Mungu newe aamiriryi na kukurya.

⁷ Ibhu, wanu akuhamba zendetere itari kegero, nuru wanu akwitirira, nawe Mungu wanu akukurya newe wu ukwisegwa.

8 Wunu akuhamba na wunu akwitirira bhushi bhari bhwaheene, Mungu aramoha wumwi wumwi umubhanu gwazi, kuring'aana na chimbu aakuriri emeremo jazi.

9 Nirabhugabhu ku kubha emeremo ginu inyi na Apooro tokokora ni-ja Mungu, na niimwi ni-mugundu gwazi, naatu ni-nyumba yaazi.

10 Mungu ansakiiryi kwambaka ubhurusa kubhigangi bhyazi nchu umwambaki umazumu na wu ubhwubhuri, nu umutu wundi arumbaka iguru wu ubhurusa bhuyo. Nawe bhushi bhiitore chimbu bhakwambaka iguru waku,

11 ku kubha ubhurusa bhunu bhumariri kwambakwa ni-Yisu Kiriisitu umwene. Atareeho umutu wunu akutura kwambaka ubhurusa ubhundi.

12 Iguru yu ubhurusa bhuyo, umutu aratura kwambaka kuzahaabhu, ibhyuma, amabhwu gu ubhwera, imiti, ubhunyaaki hamwi amanyaaki,

13 nu ubhunagu bhwe emeremo ja abhaatu bhararorekana habhwira. Urusiku rwi itinira, emeremo jasi girarorekana habhwira, ku kubha emeremo ja abhaatu bhushi, girarengerwa komorero gwi itinira.

14 Ariibhi emeremo ju umutu girasaaga, umutu wuyo arasung'aana umubhanu.

15 Ariibhi emeremo ju umutu girahya, hayo ararimiryu umubhanu, nawe ewe umwene arasabhurwa, nangabha arabha nchu umutu wunu ahuniri rwa akanyunyi kusikira momorero gwi itinira.

16 Nangu, mutizi imwi ni-rihekaaru rya Mungu, ne Egoro ya Mungu iriikara kwa niimwi?

17 Nangu, umuntu arisaryi rihekaaru rya Mungu, umuntu wuyo, Mungu aramurarya, ku kubha rihekaaru rya Mungu ni-irindu, na rihekaaru riyo niimwi.

18 Umuntu wuwusi gati waanyu atiikangirirya kubha anu ubhwabhwari. Ariabhi umuntu ariirote anu ubhwabhwari muci yinu, abhi ariikorya mo-geege korereke abhone ubhwabhwari bhwa amahene.

19 Akorebhu, ku kubha ubhwabhwari bhw i i si yinu, ne-bhogege mubhutangi bhwa Mungu. Chimbu yandikirwi muMaandiku Amarindu, “Mungu arabhagwata bhu ubhwabhwari mubhung’ini bhwabhu.”*

20 Na yandikirwi muMaandiku Amarindu, “Umukuru aminyiri amisiigi ga bhu ubhwabhwari, kubha gataana bhweru.”†

21 Nangu umuntu wuwusi atiikumya ku kubha ewe ni-muhimba wu umuntu omorebhe, ku kubha itwasi Mungu atutiri kubhasakirya imwi,

22 abhi ni-Paauru, abhi ni-Apooro, hamwi abhi ne-Peetero. Na Mungu abhahiri ebhegero bhyu kubhasakirya, bhibhi bhya muci, hamwi ubhuhuru, hamwi uruku, bhibhi bhinu bhereho nangwinu, hamwi bhinu bhikubhaho, bhyu ni-bhyanyu.

23 Nawe imwi, ni-bha Kiriisitu, na Kiriisitu, ni-wa Mungu.

4

Emeremo ja abhatumwa

* 3:19 Rora Ayubhu 5:13. † 3:20 Rora Zabhuri 94:11.

¹ Abhaatu bhatubhari itwi kubha ni-bhahocha bha Kiriisitu, tuhiiirwi emeremo ju ukurwaza ing'ana ya Mungu yinu yaari ibhisirwi.

² Nangu, umuutu wanu ahiiirwi emeremo, areenderwa abhi omohocha umuzamu.

³ Nawe kwa niinyi, itari kegero niraatinirwi na niimwi, nauru niraatinirwi na abhatiniri bhi ichandar. Naabha inyimwene nitakwitinira,

⁴ ku kubha nitakorora ibhi ryuryusi mokoro yaani. Nawe riyo ritakugirya nibhi moheene. Umukuru Yisu newe akuntinira.

⁵ Nangu, mutatinira abhaatu ribhaga ryaku rikiri, marindi kuhika urusiku rana Umukuru Yisu akuuza. Ewe newe akorora ganu guusi gabhisirwi mukiirimya na komenyeekererya ganu gari mozekoro za abhaatu. Neho abhaatu bhusi bhakobhona ubhukumya bhana bhakwenderwa, kurwa kwa Mungu.

⁶ Abhahiiri bhaani, nigambiri amang'ana gayo guusi iguru waani na Apooro, korereke tubhi ekerenjo iguru waanyu. Kuring'aana ne ekerenjo kiyo, mwobhoore ganu gakugambwa mukigambu kinu, "Mutiitambuka ganu gaandikirwi muMaandiku Amarindu." Ariibhi maratuna ikigambu kiyo, atakubhaho umuutu wawusi wanu akwikumirya umuutu uwumwi na korega uwundi.

⁷ Nangu, ni-wiwi wanu akukuriri ubhi we eheene kukira uwundi? Una kiguruki kinu utahiiirwi na Mungu? Na ariibhi ukahaabhwa, kwaki uriikumya nkina utahiiirwi?

⁸ Nangu muriirora mumariri guusi! Muriirora abhaniibhi! Muriirora abhatimi, nangabha itwi tutari abhatimi! Hakiriku mwangabhiri abhatimi

heene, korereke tukangati hamwimwi na niimwi!

⁹ Nawe nirarora Mungu atukuriri itwi abhatumwa kubha abhaatu bhi iyaasi kukira bhushi. Twangi abhaatu bhanu bhatiniirwi kwitwa. Tukurirwi abhaatu bho okosekwa kushi, kubhamaraika* na kubhaatu.

¹⁰ Abhaatu bhaaru bharatorora itwi bhageege, ku kubha tarahokerya Kiriisitu, nawe imwi muriirora bhu ubhwabhuri ku kubha maratuna Kiriisitu. Itwi tararorekana bhanyuhiriru, nawe imwi muriirora muna amanaga. Itwi tararegwa, nawe imwi muriirora bhagungibhwa.

¹¹ Nuru nangwinu, tuni inzara ne enyoota, na tutaana zengebho za kwisa, taratemwa, na tutaana hu ukwikara.

¹² Turakora emeremo jitu kumucha bhukung'u kumabhoko giitu abheene. Hanu abhaatu bhakututuka, itwi tarabhaha urubhangu. Hanu bhakutunyaacha, turiigumirirya.

¹³ Hanu bhakutugamba kibhi, tarabhagarukirya bhwaheene. Nuru nangwinu turakorera ncha amagero gi isi, na kubhaatu bhushi itwi ni-bhubhuruuru.

¹⁴ Nitakubhaandikira amang'ana ganu kubhasuucha, nawe nereenda kubharecha ncha abhaana bhaani abhasiigwa,

¹⁵ ku kubha nangabha muna abhaatu bhaaru bhanu bhakubharera kwa Kiriisitu, wusu ni-wumwi. Inyi, ni-bhaabha waanyu kwa Yisu Kiriisitu, ku kubha inyi newe nabharwaziiri Ing'ana Inzamu.

* **4:9 Bhamaraika.** Kumaragirira bhukung'u, rora ring'ana maraika muKiniibhasa.

¹⁶ Nangu, nirabhiisasaama, mubhi muraanyiga.

¹⁷ Riyo neryo rikuriri nitumi Timoseo, umwana waani umusiigwa no omoheene momeremo ja Umakuru. Ewe arabhahiitya ganu nikutuna kukugwatana na Kiriisitu, ganu nikwija abhaatu ahagero hushi mumasengerero gushi.

¹⁸ Nangu abhandi gati waanyu bhariiyunga, ku kubha bhariiseega kubha nitakuuza kwiki kwa niimwi.

¹⁹ Nawe Umakuru araasiigi, niraaza kwa niimwi bhwangu. Hayo neho nekomenya abhaatu bhanu bhariiyunga bharagamba kwa kwiwigwa kisha heene bhana zinguru kurwa kwa Mungu.

²⁰ Nirabhugabhu ku kubha ubhutiimi bhwa Mungu,† bhutakororekana kwa amang'ana ageene, nawe mumanaga.

²¹ Nangu, moreenda nekorebhwi? Niizi kwa niimwi ni ihimbu? Hamwi niizi mubhushiigi ne ekoro ya ubhanyuhu?

5

Ubhusimbi bhutakwenderwa gati wa abhiisirirya

¹ Amang'ana gakumukiri kubha, gati waanyu kunu ubhusimbi. Ubhusimbi ncha bhuyo, bhukiri kororekana nuru kubhaatu bhanu bhatiizi Mungu, kubha umutu arakora itaru nu umukari wa wiisi.

² Kwaki imwi muriiyunga? Hakiriku mwan-garumikiri na koheebha umutu wanu akokora gayo gati waanyu!

† 4:20 *Ubhutiimi bhwa Mungu*. Kamaragirira bhukung'u, rora Ikinibhasa.

³ Nangabha nitari hamwimwi na niimwi kwu umubhiri, nawe niri hamwimwi na niimwi kokoro. Mmbe nimariri kutinira umuutu wuyo, chimbu nangakuriri hanu nangabhiri iyo.

⁴ Hanu mukwibhiringa kuriina ryu Umakuru witu Yisu, inyi nirabha hamwimwi na niimwi kokoro, nu ubhunaja bhwu Umakuru witu Yisu, bharabha hamwimwi na niimwi.

⁵ Hayo muruushiho umuutu wuyo gati waanyu na kumutiga mubhukangati bhwa Shitaani,* korereke ubhwikari bhwazi bhwa nangwinu bhasariki, newe umwene asabhurwi urusiku rwu ukugaruka ku Umakuru Yisu.

⁶ Ubhwiyoungi bhwanyu bhutakwenderwa. Mutizi kubha ubhutunduuru bhusuuhubhu, bharatunduurya riigiri ryasi?

⁷ Ibhhu mubhi muriibhingukya, kanzira yu uku-ruushaho umuutu umubhi wuyo gati waanyu, nchu ukuruusha ubhutunduuru bhwikari. Hayo marabha abhaatu abhahya, ncha riigiri riihya rinu ritaana ubhutunduuru. Na ibhu nambu mari, ku kubha Kiriisitu, iking'undu chitu chi Ipasaka,† amariri kuhurukibhwa ikimweso‡ korereke atusabhiri.

⁸ Nangu, tutakora Ipasaka kwi imikaati ji ikari ginu ginu ubhutunduuru, kubhasarya nu ubhabhi, nawe kwi imikaati ginu gitari mitunduuru,§ kumwanyu mwiru na kumaheene.

* **5:5 Shitaani.** Kamaragirira bhukung'u, rora Ikiniibhasa. † **5:7 Ipasaka.** Kamaragirira bhukung'u, rora Ikiniibhasa. ‡ **5:7 Ikimweso.** Kamaragirira bhukung'u, rora Ikiniibhasa. § **5:8** Rora Kuhuruka 12:3-20; Amahiityu gi Imigiru 16:3.

3 Mutiizi kubha turabhatinira nauru bhama-raika? Ariibhi nimbu, moreenderwa kumara amang'ana ga zisiku zusi.

4 Nangu, hanu mukwamana iguru wa amang'ana ga zisiku zusi, mahaahira ikiina chanyu kubhaatu bhanu bhatakwenderwa mwisengerero korereke bhatiniri?

5 Niragamba gayo korereke morore zisuni. Nangu, gati waanyu atareeho nauru umutu wamwi wu ubhwabhuri, wanu akutara kutina ikiina gati wa abhiisirirya?

6 Nawe imwi, mone eteemwa yu umutu kugamba umwisirirya umukindichazi muchandaru, naatu kubhanu bhataru abhiisirirya!

7 Kwigamba kuyo koreerecha kubha matamirwi kimwi. Nangu yaari irabha ni-hakiriku, umutu kuruusibhwa hamwi kogega ebhegero bhyanyu.

8 Nawe nangu, imwi niimwi mukwangira abhaatu na kuruusha ebhegero bhyabhu, na murakora gayo kwa abhiisirirya abhakindichanyu!

9 Mutiizi kubha abhabhi bhatakusikira mubhatimi bhwa Mungu? Mutiikangirirya! Bhi itaaru, abhaatu bhanu bhakosengera amasambwa, abhasibhiti, nauru bhanu bhakutaara abhasubhi kubhasubhi,

10 abhiibhi, abhiimani, abhanywi, abhagwatan'ya, abhasaakuri, bhayo bhusi bhatakusikira mubhatimi bhwa Mungu.

11 Abhandi gati waanyu bhaaribhu. Nawe nangu, ku kuhitira kuMukuru witu Yisu Kiri-isitu, na kumanaga ge Ekoru ya Mungu witu, mwajirwi abhabhi bhwanyu, mabhingukiibhwi,

na kubharwa kubha bhe eheene mubhutangi bhwa Mungu.

Abhiisirirya bhagungyi Mungu mumibhiri jabhu

¹² Abhaatu abhandi gati waanyu bharabhuga, “Twisiririibhwi kokora ebhegero bhyusi chimbu tukwenda.” Nawe bhitari bhyusi bhinu bhinu ubhwera kwa niimwi. Nangabha, “Nisiririibhwi kokora ekegero chuchusi,” nawe nitakubha mbuusa kwa chuchusi.

¹³ Abhandi gati waanyu bharabhuga, “Hanu tuni inzara toreenderwa kurya, ku kubha imibhiri jitu gereenda ibhyakurya.” Nimbu iri, nawe riraaza ribhaga hanu Mungu akuchura imibhiri jitu gibhi gitakwenda ibhyakurya. Mutabhuga, toreenderwa kokora itaarũ. Niragambabhu, ku kubha Mungu ataabhumbiri imibhiri jitu iguru wi itaarũ, nawe akabhumba iguru wo okohokerya Umakuru, wuusi Umakuru aragiriibha imibhiri jitu.

¹⁴ Na Mungu araturyura itwi kumanaga gaazi, chimbu aamuryuriri Umakuru kurwa muruku.

¹⁵ Mutizi kubha imibhiri janyu, ni-bhiimu bhyu umubhiri gwa Kiriisitu? Nangu, negege umubhiri gwani gũũ ni-kiimu che umubhiri gwa Kiriisitu, na kugwatan’ya nu umubhiri gwu umusimbi? Ziyi!

¹⁶ Mutizi kubha umuutu wuwuusi wanu akugwatana nu umusimbi, arabha umubhiri gumwi neewe? Ni-chimbu yandikirwi muMaandiku Amarindu, “Bhabhiri bhayo bharabha mubhiri gumwi.”*

¹⁷ Nawe umuutu wuwuusi wanu akugwatana nu Umakuru, arabha koro yimwi neewe.

* **6:16** Rora Ubhutangi 2:24.

18 Ibhu mwiyangariri mutakora ubhusimbi. Ubhubhi ubhandi bhwasu bhunu umuntu akokora, ahaakora igutu wu umubhiri gwazi, nawe umuntu wunu akokora itaaru, ahaakora ubhubhi mwasu wu umubhiri gwazi umwene.

19 Mutizi kubha imibhiri janyu nejo rihekaaru rye Ekoru Indindu yinu Mungu aabhahiri, ne Ekoru Indindu iriikara mumibhiri janyu? Ni imibhiri giyo gitari ijanyu, nawe ni-ja Mungu,

20 ku kubha mukagurwa kwiguri ikuru. Ibhu magungyi Mungu kuhitira imibhiri janyu.

7

Ameereken'yu iguru wu ubhukwiri

1 Nangu niragamba iguru wa amang'ana ganu mwanandiikiiri. Murabhuga, "Ni-bhwaheene umusubhi atigi kutaara nu umukari."*

2 Nawe ku kubha murakora itaaru, umusubhi abhi nu umukari waazi umwene, nu umukari abhi nu umusubhi waazi umwene.

3 Umusubhi abhi arakorera mukaazi chimbu ikwenderwa, nu umukari abhi arakorera umusubhi chimbu ikwenderwa.

4 Umukari ataana ubhanaja iguru wu umubhiri gwazi, nawe umusubhi waazi newe anabhw. Nu umusubhi ataana ubhanaja iguru wu umubhiri gwazi, nawe mukaazi newe anabhw.

5 Mutiyima, hamwi aribhi mwisirir'in'yi kokorabhu kwibhaga irebhe, korereke mobhone ribhaga ryu ukusabha Mungu. Akumara

* **7:1 Ni-bhwaheene umusubhi atigi kutaara nu umukari.** Ubhagaruri ubhandi bharatara kubha, Ni-bhwaheene umuntu atakwira.

mugarukan'yi naatu, korereke Shitaani ataaza kubhagama kokora ubhusimbi ku kubha mutakutara kwigumirirya.

⁶ Nibhabhuuriiri gayo kwa kubhatongera kwibhaga isuuhi iguru wu ukusabha, itari kubhahatika.

⁷ Inyi naari nishigiri abhaatu bhushi bhabhi ncha niinyi, nawe itaribhu ku kubha abhaatu bhushi Mungu abhahiri ubhunaja bhwazi, uwumwi ubhunaja bhunu, uwundi bhurya.

⁸ Nangu, nirabhabhurira bhanu bhakiri kukwira na abhakwirwa, ni-bhwaheene bhang'ehe kwikara abheene, bhatakwira hamwi kukwirwa, chimbu inyi niri.

⁹ Nawe ariibhi bhatakutara kwigumirirya, ni-bhwaheene bhakwiri hamwi kukwirwa, ku kubha hakiriku kokorabhu kukira kubha ni inamba haari yu umubhiri.

¹⁰ Kubhanu bhamariri kwikwira, nirabhaswaja. Riswaja riyo ritari ryani, nawe riruuri kuMukuru Yisu kubha, umukari atataana nu umusubhi waazi.[†]

¹¹ Nawe aritaani nawe, atakwirwa nu umusubhi uwundi, hamwi iigwani nu umusubhi waazi na kugarukan'ya. Nu umusubhi, atatiga umukari waazi.

¹² Nawe kubhisirirya abhandi, amang'ana ganu niinyi nikubhuga, atari Umukuru Yisu. Ariibhi umusubhi umwisirirya akwiriri umukari wanu atari umwisirirya, nu umukari wuyo isiriiryi kwikara nawe, atamutiga.

[†] **7:10** Rora Mataayo 5:32; Maaroko 10:9, 12.

13 Nu umukari umwisirirya, ariibhi akwirirwi nu umusubhi wanu atari umwisirirya, nu umusubhi wuyo isiriiryi kwikara nawe, atamutiga.

14 Niragambabhu, ku kabha Mungu arabhingukya umusubhi wanu atari umwisirirya, iguru wu umukari waazi. Nu umukari wanu atari umwisirirya, Mungu aramabhingukya iguru wu umusubhi waazi. Na yangatamiri kabhabhu, abhaana bhaanyu bhataari bharabha abhaana bha Mungu, nawe nangu ni-bharindu.

15 Nawe ariibhi wanu atari umwisirirya areenda kutaana nu umakindichazi umwisirirya, mutigi akorebhu. Hayo umwisirirya wuyo atakobhohwa nu ubhukwiri bhuyo, ku kabha Mungu atubhirikiiri korereke twikari komorembe.

16 Awi umukari umwisirirya, utakutura komenya, hamwi umusubhi waazu aratura kwisirirya Kiriisitu iguru wu ubhwisirirya bhwarzu. Na naawi umusubhi umwisirirya, utakutura komenya, hamwi umukari waazu aratura kwisirirya Kiriisitu ku kabha yu ubhwisirirya bhwarzu.

Abhiisirirya bhiikari chimbu bhaabhirikiirwi na Mungu

17 Abhaatu bhuzi bhiikari kuring'aana na chimbu Umukuru abhahiri, na bhasaagi chimbu bhaari hanu Mungu aabhabhirikiiri. Ibhuni mbu nikutuma mumasengerero guzi.

18 Ariibhi umutu akabhirikiirwa na Mungu inu amariri kusaarwa,† atiikorya kina atasaarirwi.

† 7:18 **Kusaarwa.** Kamaragirira bhukung'u, rora ring'ana ukusaara muKiniibhasa.

Na ariibhi umuutu akabhirikirwa na Mungu akiri kusaarwa, atasaarwa.

¹⁹ Kusaarwa hamwi kutama kusaarwa kutaana bhweru. Ekegero kinu kinu ubhweru ni-kugwata imigiru ja Mungu.

²⁰ Nangu, abhaatu bhusi bhasaagi chimbu bhaari hanu Mungu aabhabhirikiiri.

²¹ Ariibhi Mungu akakubhirikira hanu waari mbusa, riyo ritakunyaacha. Nawe ariibhi urabhona umweya gwu ukubha nu ubhwiyaagaruri, okorebhu.

²² Nibhugiri riyo ritakunyaacha, ku kubha umuutu wanu aari mbusa, hanu abhirikiirwi nu Umukuru, wuyo anu ubhwiyaagaruri kuMukuru. Nawe wanu aari nu umweya hanu abhirikiirwi, wuyo ni-mbusa wa Kiriisitu.

²³ Mukagurwa kwiguri ikuru. Ibhuru, mutabha bhambusa bha abhaatu.

²⁴ Abhahiiri bhaani, abhaatu bhusi bhasaagi mabhutangi bhwa Mungu, chimbu bhaari hanu bhabhirikiirwi neewe.

Ameereken'yu kubhanu bhakiri kukwirwa na kubhakwirwa

²⁵ Nangu, kubhaacha bhanu bhakiri kukwirwa,§ nitaana riswaja kurwa ku Umukuru Yisu. Nawe nirabheerekeererya kumiisiigi gaani, inyi wanu nikwenderwa kwisiriribhwa ku kubha yu urubhangu rwa Mungu.

§ 7:25 *Kubhaacha bhanu bhakiri kukwirwa*, ubhagaruri ubhundi bharatura kubha, *kubhanu bhakiri kukwira hamwi kukwirwa*.

26 Mmbe, ku kubha kuni inyaaku nzaru zisiku zinu, niriiseega kubha, ni-bhwaheene umutu asaagi chimbu ari.

27 Ariibhi ukwiriri, oteenda kutaana nu umukari waazu. Ariibhi ukiri kukwira, oteenda kukwira.

28 Nawe nuru urakwiri, utakubha ukiriri ubhubhi. Nu umuucha wusi, arakwirwi, atakubha akiriri ubhubhi. Nawe, bhanu bhiikwiriri, zinyaaku za musu zirabhabhona. Na niinyi nitakusiiga zinyaaku ziyo zibhabhone.

29 Abhahiiri bhaani, nereenda kugambabhu, ribhaga rinu risaagiri kuhika Kiriisitu agaruki ritari irihu. Kwima nangwinu bhanu bhakwiriri bhatigi kwiseega abhakari bhaabhu abheene, koreke bhakore emeremo ju Umukuru.

30 Na bhanu bhakurira, bhanu bhakozomerwa, bhanu bhakugura ebhegero,

31 na bhanu bhusi bhakunyaaka nu ubhwikari bhwa kusi yinu, bhatanyaakira bhakung'u amang'ana gayo. Bhabhi bharakora emeremo ju Umukuru, ku kubha isi yinu chimbu tokoyerora, irahita.

32 Nereenda mutabha nu uruhaho iguru wa amang'ana gu ubhwikari bhanu. Umutu wanu akiri kukwira, ahaakora emeremo ju Umukuru, ariiseega chimbu akozomeerya Umukuru.

33 Nawe umutu wanu akwiriri, ahaanyaakira amang'ana gu ubhwikari bhanu, ariiseega chimbu akozomeerya umukari waazi,

34 amiisigi gaazi garabha mbaara ibhiri. Nu umukari wanu ataana umusubhi nuru umuucha, ahaakora emeremo ju Umukuru, kubharindu umubhiri ne ekoro. Nawe umukari wanu akwirirwi, ahaanyaakira amang'ana gu

ubhwikari bhunu, ariiseega chimbu akozomeerya umusubhi waazi.

³⁵ Niragamba amang'ana gayo kubhvera bhwanyu, itari nereenda kubharecha. Nereenda mubhi muriikara chimbu ikwenderwa, mubhi marahokerya Umukuru kumwayu gwasi.

³⁶ Umuntu wawusi wanu akorora kubha itari bhwaheene kutiga kukwira umuucha wanu amurunjiryi, na ariibhi umwayu gwazi garamatama,* nu amuntu wuyo ararora kubha ereenderwa bhiikwiri, akore chimbu akwenda, bhiikwiri. Hayo atakubha akuriri ubhubhi.

³⁷ Na ariibhi umusubhi indiri umwene kurwa mokoro yaazi kubha atakukwira, na kitareeho kinu kikumusing'iirirya kukwira, na aratura kuriibha inamba yu umubhiri gwazi, arabha akuriri bhwaheene.

³⁸ Wanu akutinira kukwira umuucha wanu amurunjiryi, arakora bhwaheene. Nawe wanu atakukwira, arakora bhwaheene bhukung'u.†

³⁹ Umukari wanu akwirirwi, ahaabhohwa nu ubhukwirwa ribhaga ryasi rinu umusubhi waazi

* **7:36 Na ariibhi umwayu gwazi garamatama**, ubhagaruri ubhundi bharatara kubha, naatu nuru imyaka jazi ju ukukwirwa gihitiri. † **7:38** Kuzikiriri zinu, ubhagaruri ubhundi bharatara kubha, Umuntu wawusi wanu akorora kubha itari bhwaheene kutiga umuucha wanu arunjibhwi, nuru imyaka jazi ju ukukwirwa gihitiri, nu amuntu wuyo ararora kubha ereenderwa amukwiryi, akore chimbu akwenda, amukwiryi. Hayo atakubha akuriri ubhubhi. Na ariibhi amuntu indiri kumwayu gwazi umwene kubha atakumukwiryi umuucha waazi, na kitareeho ekegero kinu kikumusing'iirirya kumukwiryi, naatu aratura kugangata ubhusigi bhwazi, mube, arabha akuriri bhwaheene. Ihu, amuntu wanu akutinira kumukwiryi umuucha waazi wanu arunjibhwi, arakora bhwaheene. Nawe wanu atakumukwiryi, arakora bhwaheene bhukung'u.

akiri mahuu. Nawe ariibhi umusubhi waazi akuuri, hayo arabha nu umweya kukwirwa nu umusubhi wawuusi wanu akwenda, nawe umusubhi wuyo abhi mhimba wu Umukuru.

⁴⁰ Nawe hakiriku bhakung'u umukwirwa wuyo asaagi chimbu ari. Gayo ni-miisiigi gaani, na niriiseega kubha inyi kwiki Egoro ya Mungu irankangata kugamba amang'ana gayo.

8

Ibhyakurya bhinu bhisingirwi amasambwa

¹ Nangu niragamba iguru wi ibhyakurya bhinu bhisingirwi amasambwa. Tuminyiri kubha, itwusi tanu ubhuminyi. Nawe ubhuminyi bharakora abhaatu bhiiyangi. Nawe ubhusigi nebhwe bhakubhakong'ya abhaatu mubhwisirirya.

² Ariibhi umuutu ariirora aminyiri ring'ana obhorebhe, wuyo akiri komenya ryaryasi chimbu akwenderwa komenya.

³ Nawe umuutu wanu amasiigiri Mungu, wuyo newe aminyikini na Mungu.

⁴ Nangu iguru wu kurya ibhyakurya bhinu bhisingirwi amasambwa, tuminyiri kubha amasambwa ganu gakoongerwa, gatari kegero kuusi kuu. Na tuminyiri kubha areho Mungu wumwibhu.

⁵ Ni-maheene abhaatu abhandi bhariiseega kubha kana amasambwa mwisaaru na kuusi. Maheene, kone ebhegero bhyaru bhinu abhaatu bhakubhibhirikira amasambwa hamwi abhakuru.

⁶ Nawe kwa niitwi, areho Mungu wumwibhu, newe Bhaabha, newe aatimiri ebhegero bhyasi.

Itwi turiikara iguru waazi. Na areho Umukuru wumwibhu, newe Yisu Kiriisitu, ne ebhegero bhyusi bhikateemwa kuhitira kwawi, na niitwi bhahuru turi kuhitira kwawe.

⁷ Nawe itari abhaatu bhuusi bhaana ubhuminyi bhuyo, ku kubha bhareho abhandi bhanu bhaari ni isimuka yo okosengera amasambwa. Nuru nangwinu bhararya ibhyakurya bhinu bhisingiirwi amasambwa, ibhyakurya bhiyo bhirabhakora kwiseega amasambwa. Hayo bhariirora mozekoro zaabhu kubha bharakora ubhubhi, ku kubha bhakiri kokong'a mubhwisirirya.

⁸ Nawe ibhyakurya bhitakututura haguhi na Mungu, ku kubha nuru turiitigi kurya, tutakubhurya kegero, nuru turiiryi, tutakwongerwa kegero.

⁹ Nawe mwiyangariri bhwaheene, umweya gwanyu gutabha goreendeerya bhanu bhakiri kokong'a mubhwisirirya.

¹⁰ Nirabhugabhu, ku kubha umuntu wanu akiiri kokong'a mubhwisirirya, ariibhi arakorora awi wanu uminyiri kubha amabhirubhiru gataana ubhubhu, urarya ibhyakurya mwihekaaruru ryu ukusabhira amabhirubhiru, atakwiseega mokoro yaazi kubha wusi areenderwa kurya ibhyakurya bhinu bhisingiirwi amabhirubhiru?

¹¹ Kanzira yiyo, umwisirirya umakindichazu wanu akiiri kokong'a mubhwisirirya, wanu Kiriisitu aamukuuriiri, ararika iguru wu ubhuminyi bhwazu.

¹² Ariibhi murasariirya abhiisirirya abhakindichanyu bhanu bhakiri kokong'a

mubhwisirirya, bhakore ubhubhi, na kubhanyahaara zekoro zaabha, hayo murabha murasariirya Kiriisitu.

¹³ Kugayo, ariubhi ibhyakurya bhinu nikurya, bhiragirya umwisirirya umukindichani akore ubhubhi, nitakurya zee inyama ye eteemwa yiyo, korereke nitaaza kugirya umwisirirya umukindichani akore ubhubhi.

9

Amang'ana ganu abhatumwa bhakwenderwa kubaabha

¹ Nangu, inyi nitaana ubhwiyaagaruri? Inyi nitari umutumwa? Inyi nitaruzi Umukuru witu Yisu? Ne emeremo ginu inyi nakuriri gitari nejo gigiriri imwi mwisiriri Umukuru?

² Nangabha abhaatu abhandi bhararora inyi nitari umutumwa, nawe kwa niimwi inyi ni-mutumwa, ku kubha ubhwisirirya bhwanyu kwa Kiriisitu ni-rukaamu ranu rukwerecha inyi nitumirwi na Umukuru.

³ Abhaatu bhanu bhakanyanga, nitari umutumwa, nirabhabhurira,

⁴ itwi tutakwenderwa kubaabha bhyu ukurya na bhyu ukunywa iguru we emeremo jitu ju ubhutumwa?

⁵ Nangu, itwi tutakwenderwa kuja na abhakari bhitu abhisirirya orogendo rwu ukuragan'ya ing'ana iguru wa Kiriisitu, chimbura abhatumwa abhandi, abhahiri bhu Umukuru Yisu na Peetero?

⁶ Hamwi niinyi na Bharinaabha abheene tukwenderwa kokora emeremo korereke tobhone ebhegero iguru wu ubhwikari bhwitu?

7 Ni-musirikariki wanu akuja mwihi kwa kwirihha umwene? Ni-murimiki wanu akurima imizabhiibhu, na atarya imisumu jazi? Naatu ni-muriishaki wanu akuriisha imitugu, na atanywa amabheere gi imitugu giyo?

8 Amang'ana ganu nikugamba, gatari amiisiigi ga abhaatu abheene? Ni imigiru ja Musa* jasi gitakubhugabhu?

9 Mumigiru ja Musa yandikirwi, “Hanu eng'ombe ikuhura inganu, utayebhoha umunywa.”† Nangu, nekwe ukubhuga Mungu ariiseega iguru wa zeng'ombe izeene?

10 Kisha aari aragamba iguru wiitu? Nimbu iri! Amaandiku gayo gaandikirwi iguru wiitu, ku kubha wanu akurima na wanu akogesa, bhushi bhareenderwa kwisega bharabhona esondo.

11 Itwi tukabharwazira ing'ana iguru wa Kiri-isitu, twari nchu umuntu wanu akuhamba zenderere. Nangu, ni-ng'ana ikung'u kwa niimwi kotoha ebhegero bhyu ukurya na kunywa, korereke tobhone ubhwera, nchu umuntu wanu akogesa?

12 Ariibhi abhandi bhareenderwa kuhaabhwa ebhegero ncha bhiyo kurwa kwa niimwi, nangu itwi, tutakwenderwa kuhaabhwa ebhegero bhiyo kukiraho?

Nawe itwi tataasabhiri ganu tukwenderwa kuhaabhwa na niimwi, nawe twigumiriiryi kwa guusi, korereke tataaza kubharecha abhaatu kwisirirya Ing'ana Inzumu iguru wa Kiriisitu.

13 Nangu, mutizi kubha bhanu bhakokora

* **9:8 Musa.** Kamaragirira bhakung'u, rora Ikiniibhasa. † **9:9** Rora Amahiitya gi Imigiru 25:4.

emeremo mwihekaarũ,‡ bharabhona ibhyakurya bhyabhũ mwihekaarũ riyo? Na mutizi kubha bhanũ bhakokora emeremo ahagero hu ukuhurukirya ikimweso, bharasung'aana esondo yaabhũ, kurwa mubhinũ bhikuhurukibhwa ikimweso?

¹⁴ Nu Umukuru Yisu aswajiryi ibhuibhu, kubha, bhanũ bhakurwaza Ing'ana Inzumu, bhabhone kinũ bhakwenda kurwa momeremo giyo.

¹⁵ Nawe inyi nikiiri kugamba nuuru rimwi muganũ nikwenderwa kũhaabhwa. Na nitakwandikabhu, korereke nihaabhwi gayo. Kwa niinyi hakiriku kukwa kukira kusakiribhwa ebhegero kurwa kwa niimwi, kũ kubha nitakwenda umuutu wuwuusi andeche ukwikumya iguru wũ ukuragan'ya Ing'ana Inzumu, kanzira yo okong'a ebhegero.

¹⁶ Inyi nitakwenderwa kwikumya iguru wũ ukurwaza Ing'ana Inzumu, kũ kubha emeremo giyo nejo nitumirwi kokora. Na horeera inyi ariibhi nitakurwaza Ing'ana Inzumu yiyo.

¹⁷ Nangabhiiri nirakora emeremo ginũ kubhusigi bhwani inyimwene, naari niriisega kobhona umubhanũ. Nawe itaribhu, Mungu newe ang'iri emeremo ginũ negekore.

¹⁸ Nangũ umubhanũ gwani niki? Umubhanũ gwani ni-kurwaza Ing'ana Inzumu bhũha, nitakusabha ganũ nikwenderwa kũhaabhwa iguru wũ ukurwaza Ing'ana yiyo.

Amang'ana ganũ abhatumwa bhakwenderwa kokora

‡ **9:13 Rihekaarũ.** Kumaragirira bhakung'u, rora Ikiniibhasa.

19 Inyi nitari mbuusa wu umuutu wawuusi, ninu ubhwiyaagaruri. Nawe niitiri mbuusa wa abhaatu bhuusi, korereke kubhasakirya abhaatu bhiisiriryi Kiriisitu.

20 KuBhayaahudi, naari nchu Umuyaahudi, korereke nibhasakirya bhiisiriryi Kiriisitu. Iny-imwene nitari iyaasi wi imigiru ja Musa, nawe nikiitura iyaasi wi imigiru giyo, kubhanu bhakutuna imigiru giyo, korereke nibhasakirya bhiisiriryi Kiriisitu.

21 Kubhanu bhataari ni imigiru ja Musa, naari nchu umuutu wanu ataana imigiru giyo, korereke nibhasakirya bhiisiriryi Kiriisitu. Kokorabhu kutari nekwe ukubhuga nitaana imigiru mubhutangi bhwa Mungu, nawe nirakangatwa ni imigiru ja Kiriisitu.

22 Kubhanu bhakiri kokong'a mubhwisirirya, naari nanga wanu akiri kokong'a mubhwisirirya korereke nibhasakirya bhiisiriryi Kiriisitu. Nikakora guusi kubhaatu buusi, korereke kuzinzira zuzuusi zirya nitari kusabhura abhaatu obhorebhe.

23 Nirakora gayo guusi iguru wi Ing'ana Inzumu korereke nigwatani na abhandi murubhangu rwazi.

24 Mutizi abhaatu bhanu bharahigana kurya umwega, bhararyara buusi, nawe wanu akusung'aana umubhanu ni-wamwibhu? Nangu mubhi muryara bhukung'u, korereke musung'aani umubhanu.

25 Bhanu bhakuhigana muribharaana, bhariiyangarira kumaaru iguru wu ukuhigana. Bharakorabhu korereke bhasung'aani ikirungu

chi ibhaga isuuhubhu. Nawe itwi turakorabhu, korereke tusung'aani ikirungu kinu kikwikara kemerano.

²⁶ Iguru wa riyo inyini nitakuryara nchu umuntu wenu akuryara atiizi chu ukugirya aryari, na nitakwitana nchu umuntu wenu akutaasha ibhikundi bhaha.

²⁷ Nawe niranyaacha na kunarya umubhiri gwani kwigumirirya, korereke hanu nikumara kubharwazira abhaatu ing'ana inzamu, nitaaza kwangwa mubhutangi bhwa Mungu.

10

Amaangiriji iguru wo okosengera amasambwa

¹ Abhahiiri bhaani, nereenda muhiiti, hanu bhasukuru bhaaruuri Miisiri, bhaari bharakan-gatwa na risaar*, naatu bhusi bhakahita gatigati wi inyanza.

² Hanu bhaakangatirwi na risaar na kuhita gatigati wi inyanza bhakabhatiizwa kubha abhahimba bha Musa.[†]

³ Bhusi bhakarya ibhyakurya bhinu bhyaruuri mwisaaru.[‡]

⁴ Na bhakanywa amanzi ganu Mungu aabhahiiri, kurwa kwitari rinu ryari rekogenda hamwimwi nabhu. § Ritari riyo ryari ni-Kiriisitu.

⁵ Nawe bhaaru gati waabhu, bhaari bharakora ganu gatazumiiri Mungu, kwibhu bhakarichwa, ibhitundu bhyabhu bhikanyaragana kukibhara.

* **10:1** Rora Kukuruka 13:21-22. † **10:2** Rora Kukuruka 14:22-29.

‡ **10:3** Rora Kukuruka 16:35. § **10:4** Rora Kukuruka 17:1-7; Ukubhara 20:2-17.

⁶ Mmbe, amang'ana gayo guusi, ne-bherenjo kwa niitwi, korereke tatabha turiigomba amabhi, chimbu ebho bhaari bhariigomba amabhi.

⁷ Mutabha murasengera amasambwa, chimbu abhandi gati waabhu bhaari bhakokora. Iguru waabhu yandikirwi muMaandiku Amarindu, "Abhaatu bhakiikara kurya na kunywa, na ribhaga irindi bhakiimirira kubhina."*

⁸ Na tatakora ubhusimbi, chimbu abhandi gati waabhu bhaari bhakokora, kuhika abhaatu bhikwi merongo ibhiri na bhitatu bhakarichwa rusiku rumwi.†

⁹ Na tatabha turagema Umukuru,‡ chimbu abhandi gati waabhu bhaamugimiri, bhakarumwa ne enzoka, bhakakwa.§

¹⁰ Naatu mutiibheerya chimbu abhandi gati waabhu bhiibhiriri, bhakiitwa na maraika umuricha.*

¹¹ Mmbe, amang'ana gayo guusi ganu gaabhabhwini ebho, gakaandikwa korereke gabhi ebherenjo bhyo okotorecha bhanu tukwikara zisiku zi itiniru zinu.

¹² Ibhu, wunu akwirora imiiriiri bhwima mubh-wisirirya, ikabhaahi, ataaza kugwa.

¹³ Ibhitiimotiimo bhinu bhibhabhwini, bhyangi bhinu abhaatu abhandi bhakobhona siku zuusi. Nawe Mungu, ne-moheene, ewe atakubhatiga mogemwe kukira amanaga gaanyu. Hanu moko-gemwa, Mungu arabhaha amanaga gu ukwigu-mirirya ni inzira yu ukuhurukira.

* **10:7** Rora Kukuruka 32:6. † **10:8** Rora Ukubhara 25:1-9.

‡ **10:9** Umukuru, Zibhibhuriya izindi zirabhuga, Kiriisitu. § **10:9** Rora Ukubhara 21:4-9. * **10:10** Rora Ukubhara 16:41-49.

14 Iguru wa gayo, abhasigwa bhaani, mwiyan-gariri mutasengera amasambwa!

15 Niragamba na niimwi abhaatu bha amang'ini, mwisege imubheene iguru wa ganu nikugamba.

16 Nangu, hana tukunywira ekekombe cha urubhangu, ribhaga ryi ibhyakurya bhyu Umakuru, iguru wu ukukumya Mungu, tutakubha turagwatana mamasahi ga Kiriisitu? Na hana tukusunyura umukaati na kurya, tutakubha turagwatana kumbhiri gwa Kiriisitu?

17 Umukaati gani gukutugwatan'ya ni-gumwi. Kwibhu itwi bhushi ni-mubhiri gumwi, nangabha bhaaru turi.

18 Morore Abhiiziriri. Bhanu bhakurya bhinu bhiruusiibhwi ikimweso ahagero hu ukuhurukirya ikimweso, bharagwatana na Mungu kanzira yi ikimweso kiyo.†

19 Nangu, nigambiki? Ibhyakurya bhinu bhisigirwi amabhirubhiru bhinu ubhwera bhwabhwusi? Hamwi amabhirubhiru guusi, ne-kegero?

20 Ziyi! Nereenda kubhuga ibhimweso bhinu bhakuhurucha abhaatu bhanu bhatamwizi Mungu, bhatakuhurukirya Mungu, nawe bharahurucha kumasambwa. Na niinyi nitakwenda imwi mugwatani na amasambwa.

21 Mutakwenderwa kunywira ekekombe cha Umakuru na cha amasambwa. Mutakwenderwa kurya ibhyakurya bhyu Umakuru na bhya amasambwa.

† 10:18 Rora Abharaawi 7:6-10, 14-15.

22 Kisha toreenda kokora Umukuru abhi na ri-hari? Muriiseega tuna amanaga kumukira?

Ganu abhiisirirya bhakokora gagungyi Mungu

23 Abhaatu abhandi gati waanyu bharabhuga, “Ebhegero bhyasi bhyisiririibhwi kokorwa.” Nawe inyi nirabhuga, itari bhyasi bhinu ubhwera kwa niitwi. Na bharabhuga, “Ebhegero bhyasi bhyisiririibhwi kokorwa.” Nawe inyi nirabhuga, itari ebhegero bhyasi bhirasakirya ubhwisirirya bhwituhunagi.

24 Umuntu ataangarira ganu gakumusakirya ewe umwene, nawe aangariri ganu gakusakirya abhakindichazi.

25 Muriy inyama yuyusi yinu ikuguribhwa momoteera mutabhuuryabhuurya, korereke mutanyaaka mozekoro zaanyu,

26 ku kubha Amaandiku Amarindu garabhuga, “Ishi hamwimwi ne ebhegero bhyasi bhinu bhirimu ni-bhyu Umukuru.”†

27 Ariibhi umuntu wanu atari umwisirirya abhaginihiryi kurya, na niimwi mwisiriiriyi kuja, muriy inyama yuyusi yinu abhatingiri mutabhuuryabhuurya, korereke mutanyaaka mozekoro zaanyu.

28 Nawe ariibhi umuntu arabhabhuurira, “Ibhyakurya bhinu bhisingirwi amasambwa,” hayo mutarya ibhyakurya bhiyo, iguru wu umuntu wanu abhabhuuriiri, naatu iguru wa amagambu ga mokoro.

29 Hanu nikugamba, “Iguru wa amagambu ga mokoro,” nitakugamba iguru wu ubhwindi bhwituhunagi, nawe iguru we egoro yu umuntu wanu

† 10:26 Rora Zabhuri 24:1.

abhabhuuriiri. Nawe kwaki amagambu ga mokoro ya uwundi, gareche umweya gwani?

³⁰ Ariibhi inyi nirarya ibhyakurya bhiyo ku kukumya Mungu, kwaki nitukwi iguru wi ibhyakurya bhinu nikubhurira Mungu, azumiryi?

³¹ Mmbe nangu, chuchasi kinu mokokora, ibhi ni-kurya, ibhi ni-kunywa, hamwi nuru ekegero ikindi, mokore iguru wu ukukumya Mungu.

³² Mutabha murabheendeerya Abhayaahudi, abhaatu bhanu bhataru Abhayaahudi, nuru risengerero rya Mungu.

³³ Mubhi chimbu inyi niri. Nirakaja kozomera abhaatu buusi kamang'ana guusi ganu nekokora. Itari nirakorabhu, korereke nebhone ubhwera inyimwene, nawe nirakorabhu korereke abhaatu bhaaru bhabhone ubhwera ko kobhona ubhutura.

11

¹ Manyigi inyi, chimbu inyusi nikwiga Kiriisitu.

Ubhwindi bhwu ukusabha

² Nirabhakumya ku kabha muranhiita mamang'ana guusi, na kugwata amiija ganu nabhahiri.

³ Nawe nereenda momenye kabha umutwi gwu umusubhi wawusi umwisirirya ni-Kiriisitu, umutwi gwu umukari umusubhi waazi, nu umutwi gwa Kiriisitu ni-Mungu.

⁴ Umusubhi wawusi wanu akukundikirya umutwi hanu akusabha, hamwi hanu akorootorera, wuyo arasuucha Kiriisitu, newe umutwi gwazi.

⁵ Nawe umukari wanu atakukundikirya umutwi gwazi hanu akusabha, hamwi hanu akorootorera, wuyo arasuucha umusubhi waazi, newe umutwi gwazi. Irabhabhu, ku kubha arabha nchu umukari wanu amwiri.*

⁶ Ariibhi umukari atakukundikirya umutwi gwazi, amwi zinzwiri zaazi! Nawe ni-suni kumukari kumwa zinzwiri, hakiriku akundikirya umutwi gwazi.

⁷ Itakwenderwa kumusubhi kukundikirya umutwi, ku kubha ewe ne ekerenjo cha Mungu, na areerecha ubhugungu bhwa Mungu. Nawe umukari areerecha ubhukuru bhu umusubhi waazi.

⁸ Niragambabhu ku kubha Mungu ataabhumbiri umusubhi kurwa kumukari, nawe akabhumba umukari kurwa kumusubhi.

⁹ Na Mungu ataabhumbiri umusubhi iguru wa umukari, nawe akabhumba umukari iguru wu umusubhi.

¹⁰ Iguru wa riyo, naatu iguru wa bhamaraika, umukari areenderwa kukundikirya umutwi gwazi, kwerecha kubha ari iyaasi wa ubhunaja bhu umusubhi waazi.

¹¹ Nawe ku kugwatana nu Umukuru, umukari ariisega umusubhi, nu umusubhi ariisega umukari.

¹² Niragambabhu, ku kubha chimbu umukari aabhumbirwi kurwa kumusubhi, ibhuibhu umusubhi ahiibhurwa nu umukari. Nawe ebhegero bhyasi bhirarwa kwa Mungu.

¹³ Nangu mutiniri abheene, ereenderwa umukari kusabha Mungu atakundikirya umutwi

* **11:5** Ribhaga riyo yaari ni-suni kumukari kumwa ikipara.

gwazi?

¹⁴ Nuru ibhiimu bhyu umubhiri ibhyene bhereerecha kubha ni-suni kumusubhi kubha na zinzwiri ndihu!

¹⁵ Nawe kumukari kubha na zinzwiri ndihu karamokora asuukwi, ku kubha ahirwi zinzwiri ndihu korereke zibhi ncha zengebho zu ukukundikirya umutwi.

¹⁶ Nawe ariibhi umutu areenda kuhakaana iguru wa amang'ana gayo, amenye kubha itwi tutaana simuka zindi kukira ziyo, nuru amasengerero ga Mungu gataana simuka yindi.

Amangiriju iguru wi ibhyakurya bhyu Umukuru

¹⁷ Iguru wa ganu nikwenda kubhatama, nitakubhakumya, ku kubha hanu mukwibhiringa matakokora gu ubhwera, nawe murakora ganu gataana bhweru.

¹⁸ Niigwiri kubha, hanu mukubha mwibhiringiri ncha risengerero, kunu ubhutaaman'ya gati waanyu. Na niinyi ahandi niriisirirya kubha nimburi.

¹⁹ Ubhutaaman'ya bhoreenderwa kubhaho gatigati waanyu, korereke bha amaheene bhamenyekane.

²⁰ Nawe nangu, hanu mubaabha mwibhiringiri matahaarya ibhyakurya bhyu Umukuru chimbu ikwenderwa,

²¹ ku kubha abhaatu bhusi bhararya ibhyakurya bhyabhu bhatakurinda abhandi. Riyo rirakora abhandi bharasaaga ni inzara, abhandi bhagwatirwi.

²² Nangu, mataana inyumba yinu mukutura kurya na kunywa? Kwaki murarega risengerero

rya Mungu na kubhasuucha bhanu bhataana ekegero? Nibhabhurririki? Nibhakumyi? Ziyi! Nitakubhakumya iguru wa amang'ana gayo.

Kurya ibhyakurya bhyu Umukuru chimbu ikwenderwa

²³ Amiija ganu nasung'aaniri kurwa kuMukuru Yisu, nego nabhahiri imwi, ubhutika bhanu iichurirwi, akagega umukaati,

²⁴ akabhurira Mungu, azumiryi, akagusunyura, akabhuga, "Ganu negwe umubhiri gwani ganu gukuhurukibhwa iguru waanyu. Mubhi marakorabhu, ku kunhiita."

²⁵ Ihuiibhu hanu bhaamariri kurya ibhyakurya, akagega ekekombe, akabhuga, "Idivaayi† yinu ni-chirikin'yu chu ubhuragi‡ ubhuhya bhanu Mungu akokora, kuhitira amasaahi gaani. Mubhi marakorabhu, ku kunhiita!"

²⁶ Na hanu mukurya umukaati guyo na kunywira ekekombe kiyo, marabha mararagan'ya ukukwa ku Umukuru kuhika hanu akuuza.

²⁷ Umuntu wawusi wanu akurya umukaati guyo hamwi kunywira ekekombe kiyo chimbu itakwenderwa, arabha akuriri ubhubhi, ku kubha arigiri umubhiri na amasaahi gu Umukuru.

²⁸ Ihbu, abhaatu bhusi bhiibhuuryi abheene, neho bharyi umukaati na kunywira ekekombe.

²⁹ Niragambabhu, ku kubha umuntu wanu akurya umukaati na kunywira ekekombe nawe atakwobhoora kubha anu ubhumwimwi nu

† 11:25 *Idivaayi*. Kumaragirira bhukung'u, rora Ikiniibhasa.

‡ 11:25 *Ubhuragi*. Kumaragirira bhukung'u, rora Ikiniibhasa.

umubhiri gwu Umukuru, wuyo arabha ariitwara umwene mutinira ya Mungu.

³⁰ Kiyo necho kikugirya kuna abhanyubhiru na abharwiri bhaaru gati waanyu, na abhandi bhakuuri.

³¹ Twangiyangariiri itubheene, Mungu ataari aratutinira.

³² Nawe nangu, hanu tukutinirwa na Umukuru, tarabha turijibhwa, korereke Mungu ataaza kututinira chimbu abhaatu bhanu bhatamwizi.

³³ Abhahiiri bhaani, hanu mukwibhiringa kurya ibhyakurya bhyu Umukuru, mwirindi.

³⁴ Ariibhi umuntu ani inzara, abhi ararya yika waazi, korereke kwibhiringa kwanyu kutabhakorera ukutinirwa. Amang'ana agandi ganu gasaagiri, hanu nikuuza niragatwara bhwaheene.

12

Ubhunaja bhwe Egoro Indindu

¹ Nangu, abhahiiri bhaani, niragamba iguru wu ubhunaja kurwa kwe Egoro Indindu, ku kubha nisigiri mubhwobhoore bhwaheene.

² Mwizi kubha hanu mwari mutizi Mungu, mukakangiriribhwa na ukukangatwa na amabhirubhiru, nangabha amabhirubhiru gataana ubuhuru!

³ Nangu nirabhabhurira, umuntu wawusi wanu ukukangatwa ne Egoro ya Mungu atakutwara kubhuga, "Yisu ihiimwi." Nu umuntu wawusi atakutwara kubhuga, "Yisu ni-Mukuru," ariibhi atakukangatwa ne Egoro Indindu.

4 Bhoreho ubhunaja bhwa teemwa zuzuusi, nawe Egoro yinu ekosondya ubhunaja bhuyo ni-yiyo yiyo.

5 Na tarahokerya Umukuru kwa teemwa zuzuusi, nawe Umukuru wanu tokohokerya ni-wuryawurya.

6 Na tarakora emeremo ja teemwa zuzuusi, nawe Mungu wanu akutunaja itwasi kokora emeremo giyo ni-wuryawurya.

7 Egoro iri yasurya kubhiisirirya bhusi, koreke abhaatu bhusi bhabhi bharabhona ubhwera.

8 Egoro iramoha umutu wamwi kugamba amang'ana gu ubhwubhuri, uwundi Egoro yiyoyiyo iramoha kugamba amang'ana gu ubhuminyi.

9 Egoro yiyoyiyo iramoha uwundi ubhunaja bhwa ukubha nu ubhwisirirya bhukuru, uwundi ubhunaja bhwo okohorya,

10 uwundi ubhunaja bhwo okokora ibhisigu, uwundi ubhunaja bhwu ukuhurucha ubhuruti. Egoro yiyoyiyo iramoha uwundi ubhunaja bhu ukwobhoora aribhi amang'ana garuuri kwe egoro imbi hamwi kwe Egoro Indindu, uwundi ubhunaja bhwa ukugamba ikigamba ikindi, uwundi ubhunaja bhwa ukugarara ikigamba kiyo.

11 Egoro Indindu yiyoyiyo yimwi irakora emeremo giyo jusi. Eyo iramoha umutu wawusi ubhunaja bhwazi, chimbu asigiri umwene.

Umubhiri gamwi, ibhiimu bhyaru

12 Umubhiri gwa umutu guni ibhiimu bhyaru, nawe ibhiimu bhiyo ni-mubhiri gamwi. Nimbu iri kamubhiri gwa Kiriisita.

13 Niragambabhu, ku kubha itwi bhushi, tubhi Abhayaahudi hamwi abhaatu bhi ibhyaru ibhindi, tubhi bhambusa hamwi bhu ubhwiyagaaruri, tubhatiizirwi kwe Ekoru yimwi na kubaabha Ekoru yimwi yiyo, korereke tubhi mubhiri gumwi.

14 Mmbe, umubhiri gutaana ikiimu kimwibhu, nawe guni ibhiimu bhyaru.

15 Ukuguru kwangabhugiri, “Inyi nitari okobhoko, kuriyo inyi nitari wa kumubhiri,” kutaari kurabha kumubhiri iguru wa riyo?

16 Nu ukutwi kwangabhugiri, “Ku riyo inyi nitari iriisu, inyi nitari wa kumubhiri,” kutaari kurabha kumubhiri iguru wa riyo?

17 Angabhiri umubhiri gwasi gabhi iriisu, umutu aari araturabhwu kwigwa? Hamwi umubhiri gwasi kwangabhiri ukutwi, umutu aari araturabhwu kwihuziirirya?

18 Nawe nangu, Mungu iindiri ibhiimu kumubhiri chimbu asigiri umwene.

19 Angabhiri ibhiimu bhyu ni-kiimu kimwi, umubhiri gwari gatakubha mubhiri.

20 Ibhiimu ni-bhyaru, nawe umubhiri ni-gumwi.

21 Iriisu ritakutara kubhura okobhoko, “Awi nitakukwenda.” Nuru umutwi gatakutara kubhura amaguru, “Imwi nitakobheenda.”

22 Kukira gayo, ibhiimu bhyu umubhiri bhinu bhekororekana ni-bhinyuhiruru, nebhyo bhikwenderwa bhukung’u.

23 Ni ibhiimu bhinu bhikwiseegwa bhikwenderwa kusuukwa, nebhyo tukusuka bhukung’u. Ibhiimu bhyu umubhiri gwiu bhinu bhekororekana bhirareeta zisani, nebhyo tukwagarira bhukung’u.

24 Ibhiimu bhinu bhitakoreeta zisuni, bhitakwenda kwangarirwa nchi ibhindi. Nawe Mungu umwene akuriri ibhiimu bhinu bhitakusuukwa bhukung'u, bhisuukwi,

25 korereke umubhiri gutataana, nawe ibhiimu bhyusi bhisakiryani.

26 Ikiimu ikimwi chu umubhiri kiraanyahaariki, bhyusi bhihaanyahaarika hamwimwi nachu. Ni ikiimu ikimwi kiraazomerwe, bhyusi bhirazomerwa hamwimwi nachu.

27 Mmbe, imwi imwusi ni-mubhiri gwa Kiriisitu na imwusi ni-bhiimu kumubhiri guyo.

28 Mungu atiri abhatumwa mwisengerero, bha kabhiri abharutiriri, bha katatu abhiija. Kwiki atiri bhanu bhakokora ibhisigu, bhanu bhaana ubhunaja bhwo okohorya abharwiri, bhwu ubhunaja bhwu ukusakirya abhandi, bhwu ubhunaja bhwu ukukangata na bhanu bhaana ubhunaja bhwu ukugamba ikigambu ikindi.

29 Nangu, abhaatu bhusi, ni-bhatumwa? Abhaatu bhusi, ni-bharutiriri? Abhaatu bhusi ni-bhiija? Abhaatu bhusi bharakora ibhisigu?

30 Na abhaatu bhusi bhaana ubhunaja bhwo okohorya abharwiri? Abhaatu bhusi bharagamba ikigambu ikindi? Abhaatu bhusi bhaana ubhunaja bhwu ukugarura ibhigambu bhiyo?

31 Mmbe, mwigombe kobhona ubhunaja ubhukuru. Nawe nangu nereenda kobheerecha inzira inzamu kukira zusi.

13

Ubhusigi

1 Nnuru nangagamba kukigambu cha abhaatu ni ikigambu cha bhamaraika, nawe ariibhi nitaana ubhushiigi, nirabha ncha ririgi rya ridebhe rinu ritaana ekegero, hamwi ncha ririgi rye ekengere yinu ekotemwa bhusha.

2 Nangabhiri nirahurucha ubhuruti nu ukwobhoora zimbisi zushi na kubha nu ubhuminyi bhwusi, nnuru ubhwisirirya bhukuru bhwu ukunaja kusaamya ibhiguru, nawe ariibhi nitaana ubhushiigi, inyi nitari kegero.

3 Na nangahurucha ebhegero bhyani bhyusi koha abhahabhi, nnuru umubhiri gwani korereke gwuchwi momorero,* nawe ariibhi nitaana ubhushiigi, nitakobhona ekegero chuchusi.

4 Ubhushiigi burakora umutu abhi mwigumirirya, umazumu, ataana rihari, abhi ataana ubhwiuyungi, na ataana kisiraani.

5 Ubhushiigi burakora umutu abhi arasuka abhandi, butakokora kwiseega amang'ana gaazi ageene, nnuru kwigatana bhwangu, nnuru kubhika ubhururu mokoro.

6 Ubhushiigi burakora umutu atazomererwa ubhubhi, nawe kozomererwa amaheene.

7 Ubhushiigi burakora abhi ariigumirirya guusi, abhi anu ubhwisirirya ribhaga ryusi, abhi anu ubhwisigi ribhaga ryusi, na abhi managu kwa guusi.

8 Kuhurucha ubhuruti, kugamba ibhigambu ibhindi, na kubha nu ubhuminyi, ubhunaja bhuyo bhwusi bhuna itiniru. Nawe ubhushiigi bhutaana itiniru!

* 13:3 **Korereke gwuchwi momorero**, Zibhibhuriya izindi zirabhuga, korereke niikumyi.

⁹ Niragambabhu ku kubha tuminyiri amang'ana masuuhubhu, naatu tararootorera hasuuhu.

¹⁰ Nawe hanu ubhunagu bhuraazi, ganu gakiiri kunaga garasira.

¹¹ Hanu naari mwana, naari niragamba gi ichana, nikamenya nchu umwana, na kwiseega gi ichana. Nawe nangu, gi ichana nigatigiri, ku kubha mukuru niri.

¹² Chimbu tokorora nangwinu, kwangi okorora ebhegero mokerore kinu kihukwiri, nawe ribhaga irindi tarabherora bhyusi habhwiru. Nangwinu niminyiri hasuuhubhu, nawe ribhaga irindi niraaza nramenya bhwaheene chimbu Mungu anyizi inyi.

¹³ Mmbe nangu, ebhegero bhitatu bhinu bhitakusira: ubhwisirirya, ubhwisigi nu ubhusigi. Na mubhiyo, ikikuru nu-bhusigi.

14

Ubhunaja bhwo okorootorera nu ukugamba ikigambu ikindi

¹ Mwikong'eererye kubha nu ubhusigi na mwigombe kobhona ubhunaja bhwe Ekoru Indindu, kindu ubhunaja bhwo okorootorera.

² Umuntu wunu akugamba ikigambu ikindi, atakugamba na abhaatu, nawe aragamba na Mungu, ku kubha ganu akugamba atareeho wunu akugamenya. Ewe arabha aragamba amang'ana gi imbisi kumanaga ge Ekoru.*

³ Nawe wunu akorootorera, aragamba na abhaatu amang'ana gu ukubhakong'ya

* 14:2 *Kumanaga ge Ekoru*, ubhugaruri ubundi bharatura kubha, *mokoro yaazi*.

mubhwisirirya, bhwa ukubhaha umwuy na gu ukubhiibhisirirya.

⁴ Wunu akugamba ikigamba ikindi, ariinaja umwene mubhwisirirya, nawe wunu akorootorera aranjaja abhisirirya abhakindichazi.

⁵ Inyi nereenda imwusi mubhi mragamba ikigamba ikindi, nawe nereenda bhakung'u mubhi mrahurucha ubhuruti. Nragambabhu, ku kubha korootorera kurasakirya abhisirirya abhandi kukira kugamba ikigamba ikindi, ariibhi atareeho wunu akukigarura ikigamba kiyo. Ihu, wunu akugamba ikigamba ikindi aragarura korereke asakiryi abhisirirya abhandi bhanagi mubhwisirirya.

⁶ Nangu, abhahiiri bhaani, niraazi kwa nimwi na kugamba ikigamba ikindi, mrahbonaki? Mutakobhona chuchusi. Nawe niraabhabhuriri ganu Mungu anhumburiiri, hamwi niraabhazi ubhuminyi, niraarootorere hamwi niriji, hayo mrahbona ubhwera.

⁷ Nimbu iri nuru kobhegero bhinu bhitari bhiru, hanu bhikuhurucha riraka, ibhi ifirimbi hamwi endono. Ariibhi bhirahurucha riraka bhitaana ubhwindi, umutu aranjabhwi komenya iryimbw?

⁸ Na ariibhi rihembe rirahurucha riraka rinu ritakomenyekana kubhaatu, ni-wiwi wunu akwikonza kwa rihi?

⁹ Nimbu iri na kwa niimwi. Ariibhi mragamba amang'ana ganu gatakomenyekana, ni-wiwi wunu akutara kwobhoora kinu mukugamba? Hanu mukugamba garabha garahita nu mukama.

¹⁰ Kusi kuni ibhigamba bhya eteemwa nzaru,

nawe kitareeho nauru ikigamba kimwi kinu kitaana enzobhooro yaku.

¹¹ Mmbe, ariibhi nitiizi ikigamba kinu uwundi akugamba, nirabha nchu umugini kumutu wuyo, wusi arabha nchu umugini kwa niinyi.

¹² Nimbu iri na kwa niimwi ku kubha muri-gomba kubha nu ubhanaja bhwe Egoro Indindu, momohye bhukung'u kubha nu ubhanaja bhanu bhukusakirya abhiisirirya abhandi bhanagi mub-hwisirirya.

¹³ Kugayo, amutu wanu akugamba ikigamba ikindi, asabhi Mungu korereke amusakiryi kugarura kinu akugamba.

¹⁴ Niragambabhu, ku kubha niraasabhi kukigamba ikindi, egoro yaani neyo ikusabha, nawe amang'ini gaani gatakobhona chuchusi.

¹⁵ Nangu nereenderwa kokorabhwi? Nirasabha kwe egoro kukigamba ikindi, na nirasabha kumang'ini. Niriimba kwe egoro kukigamba ikindi, na niriimba kumang'ini.

¹⁶ Uraamukuryi Mungu kwe egoro, amutu uwundi wanu ataana ubhanaja bhuyo bhu ukwobhoora ikigamba ikindi, aranajabhwi kwisirirya ubhukumya bhwazu kwa Mungu kwa kubhuga, "Garami"? Inu atiizi ganu ukugamba!

¹⁷ Ni-maheene kubha ubhukumya bhwazu bhuyo kwa Mungu bharatara kubha bhuzamu, nawe uwundi ukukumya kwazu kutakumusakirya kanaga mubhwisirirya.

¹⁸ Niramukumya Mungu ku kubha niragamba kukigamba ikindi kukira imwi.

¹⁹ Nawe mwisengerero nisigiri bhukung'u kugamba amang'ana ataanu ganu gaminyikini

korereke nibhiiji abhandi, kukira kugamba amang'ana bhikwi ikumi kukigamba kindi.

²⁰ Abhahiiri bhaani, mutiiseega ncha abhaana, mubhi muriiseega ncha abhaatu abhagima. Nawe iguru wu ubhubhi, mubhi ncha abhaana abhabhataari.

²¹ Yandikirwi muMaandiku Amarindu, "Umukuru arabhuga, 'Niragamba na abhaatu bhanu kuhitira abhagini bha kore, bhanu bhakugamba ikigambu ikigini, nuurubhu bhatakunyitegeerera.'"[†]

²² Kugamba ikigambu ikindi ni-chirikin'yu cha amanaga ga Mungu iguru wa abhaatu bhanu bhatari abhiisirirya, itari urukaamu iguru wa abhiisirirya. Nawe ubhuruti bharahurukibhwa iguru wa abhiisirirya, itari iguru wa abhaatu bhanu bhatari abhiisirirya.

²³ Nangu, ariubhi abhiisirirya bhiibhiringiri kusabha, akumara bhusi bhatangi kugamba ibhigambu ibhindi, akumara bhasikiri abhaatu bhanu bhataana ubhunaja bhwu ukwobhoora ikigambu ikindi, nuuru bhanu bhatari abhiisirirya, bhatakubhuga musariri?

²⁴ Nawe bhusi bharaabhi bhararootorera, akumara asikiri umutu wunu ataana ubhunaja bhwu ukwobhoora ikigambu ikindi, hamwi wunu atari umwisirirya, ganu akwigwa kurwa kwa bhusi garamokora amenye ubhubhi bhwazi. Naatu ganu akwigwa garamutinira.

²⁵ Ganu giubhisiri mokoro yaazi, garabha habhwiru, neho arahigama na kuhiinya ubhushu

[†] 14:21 Rora Isaaya 28:11-12.

kuhika haasi kosengera Mungu, arabhuga,
“Maheene Mungu ari gati waanyu!”

Ubhwindi bhwa abhiisirirya kusabha

²⁶ Mmbe, abhahiiri bhaani, tugambiki? Hanu mwibhiringiri kusabha, wamwi ariimba iryimba, uwundi ariija, uwundi aragamba ganu Mungu amwirikiriyi, uwundi aragamba ikigamba ikindi, nu uwundi aragarura. Amang’ana gayo guusi gakorwe kunaja abhiisirirya.

²⁷ Ariibhi bhareho bhanu bhakugamba ibhigamba ibhindi, bhagambi bhabhiri hamwi bhatatubhu, bhatakira hayo, bhagambi wamwi wamwi, na abheho umuntu wu ukugarura ganu bhakugamba.

²⁸ Ariibhi atareeho umuntu wu ukugarura, wanu akugamba ikigamba ikindi atigi kugamba mwisengerero, nawe agambi na Mungu kwe egoro yaazi.

²⁹ Na bhanu bhakuhurucha ubhuruti, bhagambi bhabhiri hamwi bhatatu, na abhandi bharengekan’yi amang’ana gaabha.

³⁰ Nawe ariibhi uwundi mubhanu bhakwitegeerera irikiibhwi ring’ana kurwa kwa Mungu, we embere wanu aari akugamba, akiri.

³¹ Kunzira yiyo, imwesi murabhona umweya gwu ukugamba, korereke abhaatu bhuusi bhi-ijibhwi na kuhaanwa umwuyu.

³² Ubhunaja bhwu ukuhurucha ubhuruti, burakangatwa na wanu akugamba,

³³ ku kubha Mungu witu atari wa ryumana, nawe ne-wo omorembe.

Chimbu iri mumasengerero guusi ga abharindu bha Mungu,

³⁴ hanu mukubha mwibhiringiri, abhakari bhakiri, ku kubha bhatakwenderwa kugamba. Bhabhi bhariigwa chimbu imigiru ja Musa gikubhuga.

³⁵ Ariibhi bhareenda komenya ring'ana obhorebhe, bhabhi bharabhuurya abhasubhi bhaabhu yika, ku kubha ni-suni umukari kugamba mwisengerero.

³⁶ Nangu, ring'ana rya Mungu riruuri kwa ni-imwi? Kisha ryiziri kwa niimwi imubheene?

³⁷ Ariibhi umuntu ariirora anu ubhanaja bhwu kuhurucha ubhuruti, hamwi anu ubhanaja ubhundi bhwe Egoro Indindu, amenye kubha, ganu nikubhaandikira, ni-bhuswaja kurwa kuMukuru.

³⁸ Nawe umuntu wanu akorega gayo, wusi aregwe.†

³⁹ Kugayo, abhahiiri bhaani, mukaji korootorera, na mutabha murarecha umuntu kugamba ikigambu ikindi.

⁴⁰ Nawe amang'ana gusi gakorwe bhwaheene, na kubhwindi.

15

Ukuryuka kwa Kiriisitu

¹ Nangu, abhahiiri bhaani, nirabhahiitya Ing'ana Inzamu yinu narwaziri kwa niimwi, na niimwi mukasang'aana. Yiyo neyo ikubhakora kwimirira bhwima.

² Ariibhi maragwata amang'ana ganu narwaziri kwa niimwi, hayo marabhona ubhutuurya. Nawe

† 14:38 **Wusi aregwe**, Zibhibhuriya izindi zirabhuga, wusi araregwa.

ariibhi mutakugagwata, ubhwisirirya bhwanyu bhubraha bhutaana bhweru.

³ Nikabhijja amijja amakuru ganu inyimwene naagasung'aaniri, kubha Kiriisitu akakwa iguru wu ubhubhi bhwitu, chimbu yandikirwi muMaandiku Amarindu.*

⁴ Akabhiikwa, na akaryuka urusiku rwa katatu, chimbu yandikirwi muMaandiku Amarindu.†

⁵ Akiyeerecha kwa Peetero, akumara akiyeerecha kubhatumwa bhaazi ikumi na bhabhiri.

⁶ Ibhaga rindi akiyeerecha kubhiisirirya bhanu bhaakiriri magana ataanu kwa hamwimwi. Abhaaru gati waabhu bhakiri bhahuru, nawe abhandi bhakuuri.

⁷ Akumara akiyeerecha kwa Yaakobho, ibhaga rindi akiyeerecha kubhatumwa bhusi.

⁸ Na mutiniru ya abhaatu bhusi, akiyeerecha kwa niinyi, inyi wanu nangi nchu umutu wanu iibhwirwi ribhaga rihitiri.

⁹ Inyi ni-musuuhu kukira abhatumwa bhusi, nitakwenderwa kubhirikirwa umutumwa, ku kubha nikanyaacha abhiisirirya.

¹⁰ Nawe ibhigangi bhya Mungu nebhyo bhikuriri inyi kubha umutumwa. Ni ibhigangi bhyazi kwa niinyi bhitaru bhaha, ku kubha kuhitira ibhigangi bhiyo nikuriri emeremo kukira abhatumwa bhusi. Nitaakuriri gayo kumanaga gaani inyimwene, nawe kubhigangi bhya Mungu bhinu bhekokora emeremo hamwimwi na niinyi.

¹¹ Mmbe, nibhi inyi, hamwi ebho, tararwaza ing'ana yiryayirya, na neyo mwisiriiryi.

* 15:3 Rora Isaaya 53:5-12. † 15:4 Rora Zabhuri 16:8-10.

Ukurya ka kwa abhaku

¹² Nangu, aribhi turwaziri kubha Kiriisitu akaryuka kurwa mubhaku, ibhiribhwi abhandi gati waanyu bharabhuga kubha abhaku bhatakuryuka?

¹³ Ariibhi abhaku bhatakuryaka, mmbe, Kiri-
isitu wusi ataaryukiri.

¹⁴ Na ariibhi Kiriisitu ataaryukiri, ukurwaza kwitu kurabha kutaana bwera, nuru ubhwisirirya bwanyu bwarabha bwataana bwera.

¹⁵ Naatu itwi abhatumwa twari twarorekana abhaminyiikiriri bha ururimi iguru wa amang'ana ga Mungu, ku kubha taramenyeekeererya kubha Mungu akaryura Kiriisitu kurwa mubhaku. Nawe ariibhi abhaku bhatakuryukurwa, mmbe, Mungu ataamuryuriri.

¹⁶ Niragambabhu, k_u kubha ariibhi abhaku
bhatakuryukurwa, Kiriisitu w_uu_usi ataaryukiri.

¹⁷ Na ariibhi Kiriisita ataaryukiri, ubhwisirirya bhwanyu bharabha bhutaana bwera, marabha mukiri kasabhurwa kurwa mubhabhi bhwanyu.

¹⁸ Iguru wa gayo, bhusi bhanu bhaakuuri bhisiriiryi Kiriisitu, bhabhuriri kimwi.

¹⁹ Ariibhi ubhwisigi bhwitu kwa Kiriisitu ni-bhwa kobhona ubhuhuru bhwa muusi yinu ubhwene, hayo neho tukubha abhaatu bho okororerwa ibhigungi kukira abhaatu bhushi.

²⁰ Nawe nang_u, amaheene ni-kubha Kiriisitu akaryuka kurwa mubhaku, na ewe newe we embere kuryuka kubhan_u bhakuuri.

21 Chimbu uruku rukareetwa na umuntu wamwi kuasi, ibhuibhu nu ukuryuka kwa abhaku

kukareetwa nu umuutu wumwi.

²² Na ku kubha itwi ni-rwibhuru rwa Adaamu, abhaatu bhushi bharakwa, ibhuibhu ku ukugwatana kwabha na Kiriisitu, abhaatu bhushi bhararyukurwa.

²³ Nawe abhaatu bhushi bhararyukurwa kwa ribhaga ryabha, Kiriisitu newe we embere kuryuka, na bharabhata abhaatu bhaazi, hanu araazi.

²⁴ Hayo neho itiniru ya bhyusi ikuhika, hanu Kiriisitu araamohe Bhaabha Mungu ubhutimi, ribhaga rinu akubha amariri kuricha abhakangati bhushi, bhu ubhunaja bhwusi na bha amanaga bhushi.

²⁵ Niragambabhu, ku kubha Kiriisitu areenda ateme kuhika abhahizi abhabhisa bhaazi bhushi na kubhatuura iyaasi wu ubhukangati bhwazi.†

²⁶ Umubhisa wi itiniru kurichwa nu-ruku.

²⁷ Amaandiku Amarindu garabhuga, “Mungu atiri ebhegero bhyusi iyaasi wu ubhukangati bh-wazi.”§ Amang’ana gayo “ebhegero bhyusi,” gataana enzobhooro kubha wusi Mungu atirwi iyaasi wu ubhukangati bhuyo. Ziyi, ku kubha ewe newe atiri ebhegero bhiyo iyaasi wu ubhukangati bhwa Kiriisitu.

²⁸ Na hanu ebhegero bhyusi bhikubha bhitirwi iyaasi wu ubhukangati bhu Umwana waazi,* neho Umwana wusi akutuurwa iyaasi wu ubhukangati bhwa Mungu, wunu atiri ebhegero bhyusi iyaasi

† **15:25 Kubhatuura iyaasi wu ubhukangati bhwazi**, kuKigiriki yandikirwi, *kubhatuura iyaasi wa amaguru gaazi*. Rora Zabhuri 110:1. § **15:27** Rora Zabhuri 8:6. * **15:28 Umwana waazi**. Kumaragirira bhukung’u, rora ring’ana *Umwana wa Mungu muKiniibhasa*.

wu ubhukangati bhu Umwana waazi, korereke Mungu abhi umukangati wa bhyusi.

²⁹ Nangu, abhaatu bhanu bhakubhatiizwa iguru wa abhaku bhariisegaki? Ariibhi abhaku bhatakuryukurwa nuru urusiku ramwi, kwaki abhaatu bharabhatiizwa iguru wa abhaku?

³⁰ Na niitwi kwaki turiitura munyaaku siku zuusi?

³¹ Abhahiiri bhaani, siku zuusi inyi niri munyaaku yu ukukwa. Na rinu ni-maheene, chimbu ni-maheene kubha niriikumya iguru waanyu ku kubha mugwatiini nu Umukuru wiitu Yisu Kiriisitu.

³² Ariibhi ubhwisigi bhواني bhwaru bhwi isi yinu iyeene, kwitana kwani na abhaatu bhanu bhaangi ibhityinyi ibhihaari marubhiri rwa Efeeso kwari kuna bhweraiki? Ariibhi abhaku bhatakuryuka, mmbe,

“Turyi na tunywi,
ku kubha tabhuuri turakwa.”†

³³ Mutakangiriribhwa, ku kubha, “Abhasaani abhabhi, bhahaasarya eteemwa inzamu.”

³⁴ Mutangi kohokerya amang’ini chimbu ikwenderwa, na kutiga kokora ubhubhi, ku kubha abhandi gati waanyu bhatiizi Mungu. Niragamba gayo, korereke nibhasuuchi.

Chimbu umubhiri gu kubha urusiku rwu ubhuryukuri

³⁵ Umuntu aratura kubhuurya, “Abhaku bhararyukurwabhwu? Na bharabha nu umubhiri gwa teemwaki?”

† 15:32 Rora Isaaya 22:13.

³⁶ Gayo ni-mabhuurya ge ekegeege! Uraahambi zendetere, zitakutura komera zikiri kukwa.

³⁷ Zendetere zinu mukuhamba, zibhi zi inganu hamwi zendetere izindi, zitakutuubhana ni ikitutu chaku.

³⁸ Mungu ahaaha endetere umubhiri chimbu akwenda, zendetere zusi arazihaana umubhiri gwaza umwene.

³⁹ Ibhityinyi bhyusi bhene imibhiri, nawe imibhiri giyo gitatuubhini. Imibhiri ja abhaatu ni-ja teemwa yimwi, ji ibhityinyi ni-ja teemwa zindi, ji ibhinyunyi ni-ja teemwa zindi, na ja ziswi ni-ja teemwa zindi.

⁴⁰ Na gereho imibhiri ja mwisaaru ni imibhiri ja kusi. Ubhweru bhwi imibhiri ja mwisaaru giri bhundi, nu ubhweru bhwi imibhiri ja kusi giri bhundi.

⁴¹ Ubhweru bhwi iryubha bhuri bhundi, ubhweru bhu umwiri bhuri bhundi nu ubhweru bhwa zenzota bhuri bhundi. Na zenzota zusi zinu ubhweru bhwazu.

⁴² Ibhuni nambu ikubha, ribhaga rinu abhaku bhakuryuka. Chimbu zendetere, umubhiri gusu gukubhiikwa guhaasarika, nawe gusu gukuryukurwa gutakasarika.

⁴³ Hanu umubhiri gukubhiikwa, guraregwa, nawe hanu gukuryukurwa, gurabha nu ubhweru. Hanu gukubhiikwa, guhaabha manyuuhiriru, nawe hanu gukuryukurwa, gurabha na amanaga.

⁴⁴ Hanu gukubhiikwa ni-mubhiri gwa mututu, nawe hanu gukuryukurwa ni-mubhiri muhya gusu tukuhaabhwa ne Egoro Indindu. Goreho umubhiri gwa mututu, na goreho umubhiri umuhya gusu Egoro Indindu ekotoha.

45 MuMaandiku Amarindu yandikirwi, “Umuntu we embere, Adaamu, akabhumbwa akabha mahuu,”‡ Nawe Adaamu wa mutinira, Kiriisitu newe Ekoru wunu akubhaha abhaatu ubhuhuru.

46 Nawe umubhiri gunu gukukangata ni-mubhiri gwa umuntu, ibhaga rindi garaaza umubhiri muhya gunu tukahaabhwa ne Ekoru Indindu.

47 Umuntu we embere, Adaamu, aari wa kuusi, akabhumbwa kobhototo. Umuntu wa kabhiri, Kiriisitu, akarwa mwisaaru.

48 Kwibhu abhaatu bhushi kuusi bhaana umubhiri gwa muusi nchu umubhiri gwa Adaamu. Na abhaatu bhushi mwisaaru bharabha nu umubhiri gwa mwisaaru nchu umubhiri gwa Kiriisitu.

49 Chimbu tutuubhini na Adaamu, wunu aabhumbirwi kobhototo, ibhuibhu taratuubhana na Kiriisitu, wunu ari mwisaaru.

50 Abhahiiri bhaani, ganu nikwenda kugamba ni-ganu, umubhiri gwi inyama na amasaahi gutakutara kusikira mubhatimi bhwa Mungu, na kinu kikusarika kitakutara kubha nu ubhuhuru bhwa kemerano.

51 Mwitegeerere, nirabhabhurira imbisi, itwi tutakukwa bhushi, nawe bhushi turiichura.

52 Riyo rirabha kwi ibhaga isuuu ryu ukuhindirirya nu ukaramucha, ribhaga rinu rihembe rya mutinira rikurira. Ribhaga riyo abhaku bhararyukurwa na bharabha ni imubhiri ginu gitakusarika, na niitwi abhahuru, turiichura.

53 Irabhabhu, ku kubha umubhiri gunu gukusarika goreenderwa gwichuri gabhi umubhiri gunu

‡ 15:45 Rora Ubhatangi 2:7.

gutakusarika, umubhiri gunu gukukwa gwichari kubha umubhiri gunu gutakukwa.

⁵⁴ Mmbe, umubhiri gunu gukusarika na kukwa, hanu guriichari kubha umubhiri gunu gutakusarika na kukwa, hayo neho rikubha rihikiri ring'ana rinu ryandikirwi muMaandiku Amarindu ganu gakubhuga, “Mungu ahiziri uruku, rutamirwi kimwi!”§

⁵⁵ “Uruku, ubhuhizi bhwezubhuri hayi?

Gari hayi amanaga gaazu go okoreeta ubhusungu?”*

⁵⁶ Amanaga gu uruku gararwira kubhubhi bhunu tokokora, na zinguru zu ubhubhi zirarwa kumigira.

⁵⁷ Nawe tukumyi Mungu. Ewe aratoha ubhuhizi kunzira ya Umukuru witu Yisu Kiriisitu.

⁵⁸ Mmbe, abhahiiri bhaani abhasigwa, mokong'e mubhwisirirya bhuyo, mwimiri bhwiima. Mukaji kokora emeremo ju Umukuru kumucha siku zusi, ku kubha mwizi emeremo ginu mokokora iguru wu Umukuru, gitakuhita bhaha.

16

Omosororo gwa ukusakirya abhiisirirya

¹ Nangu niragamba iguru wo omosororo gwa ukusakirya abharindu bha Mungu bha murubhiri rwa Yirusarimu. Imwi mokore chimbu nabhabhuuriiri abhaatu bha amasengerero mucharu cha Garaatiya.

§ 15:54 Rora Isaaya 25:8. * 15:55 Rora Hooseya 13:14.

2 Urusiku rwa ubhutangi rwi inyuma, abhaatu bhuusi gati waanyu bhabhi bharatwara ikibhumbika kuring'aana na ubhunaja bhwabha, korereke ribhaga rinu nikuuza kwa niimwi, mubhi mumariri kukuminga omosororo.

3 Hanu nikuhika, nirabhatuma na zinyarubha zu ubhwitundi abhaatu bhanu mokorobhora, korereke bhahiri omosororo guyo mwisengerero ga Yirusariimu.

4 Na ariibhi iraarorekani kubha inyi nereenderwa kuja, niraja hamwimwi nabha.

Ubhwindi bhwa Paauru kuhika Kurintu

5 Niraaza kwa niimwi iyo, hanu nikurwa mucharu cha Makiduniya, ku kubha nereenda kuhitira hinga Makiduniya.

6 Hanu nikuuza, niriikara na niimwi ibhaga irebhe, hamwi kwibhaga ryusi rye embeho, korereke mansakiryi kong'eha no orogendo rwani, hahuusi hanu nikuja hanu nikumara ga hayo.

7 Nitakwenda kurumana na niimwi nangwinu kwa kuhita. Niriisega kwikara kwa niimwi ibhaga irebhe, ariibhi Umukuru aranyiisiririyi.

8 Nawe nangu nirasaaga murubhiri rwa Efeeso hanu, kuhika urusiku rwi isigukuru ya Pintikusiti ihiki.

9 Nirakorabhu, ku kubha Mungu igwiri inzira, korereke nekore emeremo mikuru murubhiri ranu, nangabha bhareho abhaatu bhaaru bhanu bhakanyanga.

10 Timoseo araaza kwa niimwi, mumusung'aani bhwaheene, korereke iikari ataana ubhwubha, ku kubha ewe arakora emeremo ju Umukuru ncha niinyi.

11 Umuntu wuwusi atamorega. Nawe mumsakiryi abhuki iyo no omorembe, korereke aturi kugaruka iwaani, ku kubha inyi nirarinda hamwimwi na abhiisirirya abhakindichita.

12 Nangu, iguru wu umwisirirya umakindichita Apooro, nimukandikijiryi bhakung'u aazi kwa nimwi hamwimwi na abhiisirirya abhandi. Nawe ewe atiindiri kuuza nangwinu. Araaza hanu akobhona umweya.

Amang'ana gukura

13 Mubhi mису, mokong'e mubhwisirirya, na mubhi abhakaari na bha amanaga.

14 Mubhi murakora amang'ana gaanyu guusi kubhusigi.

15 Abhahiiri bhaani, mwizi kubha Sitifaana hamwimwi na abhaatu bha yika waazi, nebho bhaari bhe embere kwisirirya Yisu Kiriisitu mucharu cha Akaaya, bhusi bhiihurukiryi kusakirya abharindu bha Mungu. Nirabhiisasaama,

16 mubhi muriigwa abhaatu ncha bhayo, na abhandi bhusi bhanu bhakokora emeremo giyo hamwimwi nabhu kumucha.

17 Nirazomerwa bhakung'u kubha Sitifaana, Furitunaatu na Akaiku, bhahikiri hanu. Ebho bhang'iri ganu nasuuhirwi kurwa kwa niimwi.

18 Bhiriryi umwuyu gwani, na bhiriryi zekoro zaanyu. Kugayo, mubhamenye bhwaheene abhaatu ncha bhanu.

19 Abhaatu bha amasengerero mucharu cha Asiya, bharabhakeerya. Akiira na mukaazi Pirisira, hamwimwi na abhiisirirya bhanu bhahiib-

hiringa yika waabha, bharabhakeerya bhakung'u kuriina ryu Umukuru Yisu Kiriisitu.

²⁰ Abhiisirirya bhusi bha hanu, bharabha-keerya. Mwikeerye kubhisiigi bhwa Kiriisitu.

²¹ Inyi Paauru niraandika amakeeren'ya ganu kokobhoko kwani inyimwene.

²² Umuntu wuwusi wanu atasiigiri Umukuru Yisu, ihimwi. Umukuru wiitu uuzi!

²³ Ibhigangi bhyu Umukuru Yisu bhibhi na nimwi.

²⁴ Nibhasiigiri imwasi, ku kugwatana na Yisu Kiriisitu.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553